





文庫 17  
W 82  
7

臨川詩鈔

十六

王安石字介甫臨川人後居金陵亦號半山登進士上第簽書淮南判官再調知鄞縣通判舒州召試館職不就用為羣牧判官知常州移提點江東刑獄嘉祐三年入為度支判官俄直集賢院明年同修起居注知制誥糾察在京刑獄以母憂去終英宗世召不起神宗為太子時聞其名即位命知江寧府數月召為翰林學士兼侍講熙寧二年拜參知政事變行新法天下騷然罷為觀文殿大學士知江寧府再起為相屢謝病又罷為鎮南節度使同平章事判江寧府改集禧觀使封舒國公元豐三年復拜左僕射觀文殿大學士換特進改封于荆哲宗加司空卒贈太傅謚曰文配食孔廟追封舒王

臨川詩鈔



昭和六十年二月一日贈  
土岐善吉唐氏寄

010185188332



南渡後始罷從祀安石少以意氣自許故詩語惟其所  
向不復更爲涵畜後從宋次道盡假唐人詩集博觀而  
約取晚年始悟深婉不迫之趣然其精嚴深刻皆步驟  
老杜所得而論者謂其有工緻無悲壯讀之久則令人  
筆拘而格退余以爲不然安石遣情世外其悲壯卽寓  
閒澹之中獨是議論過多亦是一病爾

元豐行示德逢

四山脩脩映赤日田背坵如龜兆出湖陰先生坐草室看  
踏溝車望秋實雷蟠電掣雲滔滔夜半載雨輪亭臯旱禾  
秀發埋牛尻豆死更蘇肥莢毛倒持龍骨挂屋敖買酒澆  
客追前勞三年五穀賤如水今見西成復如此元豐聖人  
與天通千秋萬歲與此同先生在野故不窮擊壤至老歌

元豐

後元豐行

歌元豐十日五日一雨風麥行千里不見土連山沒雲皆  
種黍水秧綿綿復多稔龍骨長乾挂梁椶鱒魚出網蔽洲  
渚荻筍肥甘勝牛乳百錢可得酒斗許雖非社日長聞鼓  
吳兒蹋歌女起舞但道快樂無所苦老翁墜水西南流楊  
柳中間棧小舟乘興欹眠過白下逢人歡笑得無愁

純甫出釋惠崇畫要子作詩

畫史紛紛何足數惠崇晚出吾最許旱雲六月漲林莽移  
我儻然墮洲渚黃蘆低摧雪翳土鳧雁靜立將儔侶往時  
所歷今在眼沙平水澹西江浦暮氣沈舟暗魚罟欹眠嘔  
輒如聞榜頗疑道人三昧力異域山川能斷取方諸承水



調幻藥酒落生綃變寒暑金坡巨然山數堵粉墨空多真  
漫與大梁崔白亦善畫曾見桃花淨初吐酒酣弄筆起春  
風便恐飄零作紅雨鸞流探枝婉欲語蜜蜂掇藥隨翅股  
一時二子皆絕藝裘馬穿羸久羈旅華堂豈惜萬黃金苦  
道今人不如古

招約之職方并示正甫書記

往時江總宅近在青溪曲井滅非故桐臺傾尚餘竹池塘  
三四月菱蔓芙蓉覆蒲柳亦競時冥冥一川綠方城最所  
愛意謂可穿築欲往無舟梁長年寄心目故人晚得此心  
事付草木消搖欄宇新攬結蹊隧熟更能適我願中水開  
茅屋鬼管誅荒梗人境掃喧躡濠魚淨留連海鳥暖追逐  
豈無方外客於此停高躅憶初桑落時要我豈非夙蠶眠

忽欲老一个未言速當緣東門水尚溷南浦舳吾廬雖隱  
翳賞眺還自足橫陂受後澗直塹輸前瀆跳鱗出重錦舞  
羽墮輒玉碧筍遞舒卷紫角聯出縮千枝孫嶧陽萬本母  
淇澳滿門陶令株彌岸韓侯菽尚復有野物與公新聽囑  
金鈿擁蕪菁翠被敷苜蓿蝦蟆能作技科斗似可讀櫛軒  
俯北渚花氣時度谷耘耨聊效顰締構行可續荒乘倘不  
倦一晝敢辭卜雖無北海酒乃有平津肉脩脩仙李枝城  
市久煩促寄聲與俱來蔭我臺上穀

寄吳氏女子

伯姬不見我乃今始七齡家書無虛月豈異常歸寧汝夫  
綴卿官汝兒亦摺縱兒已受師學出藍而更青女復知女  
功婉嫵有典刑自吾捨汝東中父繼在廷小父數往來吉



音汝每聆既嫁遂願懷孰如汝所丁而吾與汝母湯熨幸  
小停丘園祿一品吏卒給使令膏粱以晚食安步而車耕  
山泉臯壤間適志多所經汝何息而憂書每說涕零吾  
所封殖歲久愈華菁豈特茂松竹梧楸亦冥冥芰荷美花  
實瀾漫爭溝涇諸孫官來游誰謂川無舫姑示汝我詩知  
嘉此林壑未有擬寒山覺汝耳目熒因之授汝季季也亦  
淑靈

要望之過我廬

念子且行矣要子過我廬汲我山下泉煮我園中蔬知子  
有仁心不忍釣我魚我池在人境不與獮獺居亦復無蟲  
蛆出沒爭腐餘食罷往遊觀鱣鱖藻與蒲清波映白日擺  
尾揚其鬚豈魚有此樂而我與子無擊壤謠聖時自得以

爲娛

遊土山示蔡天啓秘校

定林瞰土山近乃在眉睫誰謂秦淮廣正可藏一鰲朝予  
欲獨往扶僊強登涉蔡侯聞之喜喜色見兩頰呼鞍追我  
馬亦以兩蹠挾斂書付衣囊裹飯隨藥笈脩脩阿蘭若土  
木老山脅鼓鐘計空曠篋篋雕捷業升堂廓無主考擊誰  
敢輒坡陀謝公冢藏椁久穿劫百金買酒地野老今行饁  
紉懷起東山勝踐比稠疊於時國累卵楚夏血常喋外實  
備艱梗中仍費調燮公能覺如夢自喻一蝴蝶桓溫適自  
斃符堅方天厭且可緩九錫寧當快一捷彼哉斗筭人得  
喪易矜怯妄言履齒折吾欲刊中牒傷心新城埭歸意終  
難愜漂搖五城舟尚想浮河檝千秋籠東月長照西州堞



豈無華屋處亦捉蒲葵箠碎金諒可惜零落隨秋葉好事  
所傳玩空殘法書帖清談眇不嗣陳迹恍如接東陽故侯  
孫少小同鼓篋一官初嶺海仰視飛鳶跼窮歸放歎段高  
卧停遠蹠牽襟肘卽見著帽耳纔摩數椽危敗屋爲我炊  
陳滬雖無膏汚鼎尚有羹濡筴縱言及平生相視開笑鬢  
邯鄲枕上事且飲且田獵或昏眠委翳或妄走超躡或叫  
號而寤或哭泣而魘幸哉同聖時田里老安帖易牛以寶  
劍擊壤勝彈鋏追憐哀晉末此土方岌岌強偷須臾樂撫  
事終愁懔予雖天戮民有械無接摺翁今貧而靜內執非  
復葉子衰極今歲儻與雞夢協委蛻亦何恨吾兒已長鬣  
翁雖齒長我未見白可鑷祝翁尚難老生理歸善攝久留  
畏年少譏我兩咕囁東火扶路還宵明狐兔懾蔡侯雄俊

士心憊形亦謀異時能飛鞚快若五陵俠胡爲阡陌間跼  
足僅相躡諒欲交轡語怯子不能嚼

再用前韻寄蔡天啓

蔡侯東方來取友無所挾脩脩一囊衣偶以一書笈定林  
朝自炊有匕或無筴時時羹藜藿鑊大苦難變驕頑遂敢  
侮有甚觀駢脅澹然山谷中變色未嘗輒始見類欺魄寒  
暄粗調接從容與之語爛漫無不涉奇經可治疾祕祝可  
解魘巫醫之所知瞽史之所業載車必百兩獨以方寸攝  
微言歸易悟疾若髭赴鑷天機信卓越學等何足躡縱談  
及旣往每與唐許協楊雄尚漢儒韓愈真秦俠好大人謂  
狂知微乃如謀惟知造文字入惑鬼愁懾秦愚旣改臯新  
耗仍易疊六書遂失指隸草矜敏捷誰珍檀山刻共賞蘭



亭帖東京一祭酒收拾偶予慙少嘗妄息索老懶因退怯  
 侯方習篆籀寸管靜嘗摩深原道德意助我耕且獵昔功  
 恐唐捐異味今得饒京口媚學子追師嘗劫劫陸贏淮汴  
 糧水儼湖海鯨遠求而近遺如目不見睫偽鳳易悅楚真  
 龍反驚葉聞予再三歎往往心不厭或自逸而走或哇而  
 不嗜或嗤元郎漫或訛白翁囁鑠金徒欲消韞玉豈愁溫  
 賢愚有定分咄汝無喋喋跨鞍隨我遊或屣聯我跼照泉  
 挹清泚跂石緣崑嶽東坡數儵魚西崦追蛺蝶翳林窺搏  
 黍藉草聽批頰黃華遠蓮鬚紅閣鄰杏壓荏苒光景流楊  
 園忽無葉扶病歸未久吾見喜寧帖塞裳告我去祿仕當  
 隨牒蕭晨秣欸段歸期得追躡謂言循東路覆出西城堞  
 行矣忍韉旅無魚勿彈鋏天閑久索驥駿足方騰蹠長驅  
 勿驕矜小跪亦勿慄鵬飛九萬里勿借風一筆溟波浩難  
 窮勉自養鱗鬣爵祿實天械功名為接摺寧能復與我搖  
 漾秦淮檝附書勿辭頻隔歲期滿篋

獨歸

鍾山獨歸雨微冥稻畦夾岡半黃青疇農心知水未足看  
 雲倚木車不停悲哉作勞亦已久暮歌如哭難為聽而我  
 官閒幸無事北窗枕簟風泠泠於時荷花擁翠蓋細浪翻  
 雪千娉婷誰能欹眼共此樂秋港雖淺可揚舠

車載板二首

荒哉我中園珍果所不產朝暮惟有鳥自呼車載板楚人  
 聞此聲莫有笑而莞而我更歌呼與之相往返視遇若搏  
 黍好音而睨睨壤壤生死夢久知無所揀物弊則歸土吾



歸其不晚歸歟汝隨我可相蒿里挽

烏有車載板朝暮嘗一至世傳鵬似鴉而此與鴉似唯能  
預人死以此有名字疑卽賈長沙當時所遭值洛陽多少  
年擾擾經世意粗聞方外語便釋形骸累吾衰久捐書放  
浪無復事尚自不見我安知汝爲異憐汝好毛羽言音亦  
清麗胡爲太多知不默而見忌楚人旣憎汝彈射將汝利  
且長隨我遊吾不汝羹藪

謝公墩

走馬白下門投鞭謝公墩昔人不可見故物尚或存問樵  
樵不知問牧牧不言摩挲蒼苔石點檢屐齒痕想此絳長  
檣想此倚短轅想此玩雲月狼籍盤與罇井邈亦已沒漫  
然禾黍村摧藏羊曇肯放浪李白魂亦已同山丘緬懷時

蘭蓀小草戲陳迹甘棠詠遺恩萬事付鬼錄耻榮何足論  
天機自開闢人理孰畔援公色無懼喜儻知禍福根涕淚  
對桓伊暮年無乃昏

明妃曲二首

明妃初出漢宮時淚濕春風鬢脚垂低徊顧影無顏色尚  
得君王不自持歸來却怪丹青手入眼平生幾曾有意態  
由來畫不成當時枉殺毛延壽一去心知更不歸可憐着  
盡漢宮衣寄聲欲問寒南事只有年年鴻雁飛家人萬里  
傳消息好在羶城莫相憶君不見咫尺長門閉阿嬌人生  
失意無南北

明妃初嫁與、羶車百兩皆、姬含情欲說獨無處傳  
與琵琶心自知黃金桿撥春風手彈看飛鴻勸酒漢宮



侍女暗垂淚沙上行人却回首漢恩自淺  
自深人生樂在相知心可憐青塚已蕪沒尚有哀絃留至今

食黍行

周公兄弟相殺戮李斯父子夷三族富貴常多患禍嬰貧  
賤亦復難爲情身隨衣食南與北至親安能常在側謂言  
黍熟同一炊炊見隴上黃離離遊人中道忽不返從此食  
黍還心悲

送春

武陵山下朝買船風吹宿霧山花鮮萬家笑語橫青天綺  
窗羅幕舞嬋娟小鬟折花叩船舷玉琰寫酒疇金錢朱甍  
飛動浮雲燼天外箏簫來宛轉斷橋人行夕陽路樓觀瑤  
瑤影中見醜顏未分驂騮催燭入坐客猶徘徊豈知閭閻

門邊住春盡不見芳菲開日月紛紛車走坂少年意氣何  
由挽洞庭浪與天地白塵昏萬里東浮眼黑貂裘敝歸幾  
時相見綠樹啼黃鸝榮華俯仰憂患隨命駕吾與高人期

酬王伯虎

吾聞人之初好惡尚無朕帝與鑿耳目賢愚遂殊品爾來  
百千年轉化薄愈甚父翁相販賣浮詐誰能審睚眦猴纓  
冠狼籍鼠穴寢滄海恐值到誰論魚鼈淪鴟聲雖云惡革  
去在食甚嗟誰職教化獨使此風稔恬觀不知救坐費太  
官廩予生少而憊好古乃天稟念此俗衰壞何嘗敢安枕  
有時不能平悲吒失食飲唯子同我病亦或涕沾衽謂予  
可告語密以詩來諭爛然辭滿紙秋水濯新錦窮觀何奉  
奉靜念復凜凜賤貧欲救世無寧猶拾濟說窮且版築尹



屈唯烹飪逢時豈遽廢避俗聊須噤徂年幸未暮此意可  
勤恁

送潮州呂使君

韓君揭陽居戚嗟與死鄰呂使揭陽去笑談面生春當復  
進趙子詩書相討論不必移鱷魚詭怪以疑民有若大顛  
者高材能動人亦勿與爲禮聽之汨彘倫同朝叙朋友異  
姓接婚姻恩義乃獨厚懷哉余所陳

和吳冲卿雪

陽回力猶遭陰合勢方輦填空忽汗漫造物誰慙慙輕於  
擘絮紛細若吹毛氤雲連晝已替風助宵仍洵憑陵雖一  
時變態亦千種簾深卷或避戶隘關猶擁滔天有凍浪匝  
地無荒隴飛揚類挾富委翳等辭寵穿幽偶相重值儉輒  
孤聳積慘會將舒羣輕那久重紛華始滿眼消釋不旋踵  
槁樹散飛花空簷落縣漣還當困炎熱以此滌煩壅共約  
市南人收藏不爲冗

和冲卿雪詩并示持國

地卷江海浮天吹河漢湧北風散作花巧麗世無種靈昏  
得照曜塵滓歸掩擁荒林無空枝幽瓦有高隴分纔一毛  
細聚或千鈞重飛颺窺已眩摧壓聽還克漁舟平繫絃樵  
屨沒歸踵空令物象瑩豈免川塗壅爭光姮娥妒失色  
和恐賴逢陽氣烝轉作水波浴舞庭稱賀嚴掃路傳呼  
衝遊謝壯少避卧甘閑冗吳侯絕俗唱韓子當敵勇勝負  
觀兩豪吾衰但陰拱

北客置酒



紫衣操鼎置客前巾韝稻飯隨梁餽引刀取肉割啖客銀  
盤擘臠藁與鮮殷勤勸侑邀一飽卷牲歸館觴更傳山蔬  
野果雜飴蜜獲脯豕腊加魚煎酒酣衆史稍欲起小  
耳爭留連爲止飲且少安一杯相屬非偶然

奉使道中寄育王山長老常坦

道人少賈海上游海舶破散身沈浮抱金滿篋人所寄吹  
簌偶得還中州羸身歸金不受報祇取斗酒相獻酬歡娛  
慈母終一世脫棄妻子藏巖幽蒼煙寥寥池水漫白玉苗  
菖吹高秋夜燃栢子煮山藥憶此東望無時休塞垣春枯  
積雪溜沙礫盛怒黃雲愁五更匹馬隨雁起想見鄧郭花  
今稠百年夸奪終一丘世上滿眼真悠悠寄聲萬里心纒  
繆莫道異趣無相求

送李屯田守桂陽

泊船香爐峰始與子相識寄書邗江上詒我峰下石緣以  
湘水竹攜持與南北永懷故人歡不願百金易竹枯歸樵  
蘇石爛棄沙礫夷門得邂逅綠髮皆半白追思少時事俛  
仰如一夕老矣無所爲空知念疇昔常息一杯酒要子相  
解釋出門事紛紛歸卧意還徂聞當上溢水持詔守嶺阨  
方爲萬里別執手先慘戚茲游信浩蕩山水多所得爲我  
謝香爐風塵每相憶

送程公闕守洪州

畫船插幟搖秋光鳴鑼傳鼓水洋洋豫章太守吳郡郎行  
指斗牛先過鄉鄉人出郭航酒漿魚鼈鱸魚炊稻粱芡頭  
肥大菱腰長醕醢喧呼坐滿床怪君三年滯瞿塘又驅傳



馬登大行纓旄脫盡歸大梁翻然出走天南疆九江左投  
貢與章揚瀾吹漂浩無旁老蛟戲水風助狂盤渦忽圻干  
丈強君聞此語悲慨懷迎吏乃前持一觴鄙州歷選多僞  
良鎮撫時有諸侯王拂天高閣朱鳥翔西山蟠繞鱗虺蒼  
下視城塹真金湯雄樓傑屋鬱相望中戶尚有千金藏漂  
田種稅出穰穰沉檀珠犀雜萬商大舟如山起牙檣一本此  
句輸瀉交廣流荆揚輕裙利屣列名倡春風蹋謠能斷腸  
平湖灣塢煙渺茫樹石珍怪花草香幽處往往聞笙簧地  
靈人秀古所臧勝兵可使酒可嘗十州將吏隨低昂談笑  
指麾回雨暘非君才高力方剛豈能跨有此一方無爲聽  
客欲霑裳使君謝吏趣治裝我行樂矣未渠央

東門

東門白下亭摧篔簹寒葩淺沙棧素舸一水宛秋蛇漁商  
數十室門巷隱桑麻翰林謫仙人往歲酒姥家調笑此水  
上能歌楊白花楊花飛白雪枝裏綠煙斜舞袖卷煙雪綺  
裘明紫霞風流翳蓬顆故地使人嗟迢迢陌頭青空復可  
藏鴟

和王微之登高齋三首

寒雲沈屯白日埋河漢蕩圻天如從衡門兼旬限泥潦卧  
聽窾木鳴相挨蕭辰忽掃纖翳盡北嶺初出青嵬嵬微之  
新詩動我目爛若火齊金盤堆想攜諸彥眺平野高論廢  
紙秦以來觥船淋浪始快意忽憶歸雲胡爲哉念君少壯  
輟游行發揮春秋名玉杯書成不得斷國論但此空語傳  
八垓登臨興罷因感觸更欲遠引追宗雷君知富貴亦何



有諂譽未足償譏排風豪雨橫費調變坐使髮背爲黃台  
留賓往往夜參半雖有罇俎無由開江南佳麗非一日况  
乃故園名池臺能招過客飲文字山水又足供歡吟剩留  
官屋貯酒母取醉不竭當如淮

六朝人物隨煙埃金輿玉几安在哉鍾山石城已寂寞祇  
見江水雲端來百年故老有存者尚憶世宗初伐淮魏王  
兵馬接踵出旗纛千里相搪挨當時謀臣非不衆上國拔  
取多陪臺龍騰九天跨四海一水欲阻爲可哈降王北歸  
樓殿拆棄屋尚鎖殘金堆神靈變化自真主將帥何力求  
公台山川清明草木靜天地不復屯雲雷使君登高訪古  
昔傷此陳迹聊持杯因留嘉客坐披寫鄙滌笑語傾如篔  
酒酣重惜功業晚老矣萬卷徒兼該攢峰列壑動歸興憂

端落筆何崔嵬餘年無歡易感激亦愧莊叟能安排青燈  
明滅照不寐但把君詩闔且開

干戈六代戰血埋雙關尚指山崔嵬當時君臣但兒戲把  
酒空勸長星杯臨春美女閉黃壤玉枝自一作藥繁如堆  
後庭新聲散樵牧興廢倏忽何其哀咸陽龍移九州圻遺  
種變化呼風雷蕭條中原礪無水嘯強又此憑江淮廣陵  
衣冠掃地去穿築隴畝爲池臺吳儂傾家助經始尺土不  
借秦人篋珠犀磊落萬艘入金壁照耀千門開建隆天飛  
跨兩海南發交廣東温台中間業業地無幾欲久割據誠  
難哉靈旗指麾盡貔虎談笑力可南山排樓船蔽川莫敢  
動扶伏但有謀臣來百年滄洲自潮汐事往不與波爭廻  
黃雲荒城失苑路白草廢時空壇垓使君新篇韻險絕登



眺感悼隨嘲哈嗟予愁憊氣已竭對壘每欲相劇揆揮毫  
更想能一戰數窘乃見詩人才

書任村馬鋪

兒童繫馬黃河曲近岸河流如可掬任村炊米朝食魚日  
暮榮陽驛中宿投老經過身獨在當時洲渚今平陸林叅  
冥冥十數家仰視荒蹊但喬木冰盤羹美客自知起看白  
水還東馳爾來百口皆年少歸與何人共此悲

葛蘊作巫山高愛其飄逸因亦作一篇

巫山高偃薄江水之滔滔水於天下實至險山亦起伏爲  
波濤其巔冥冥不可見崕岸斗絕悲猿猱赤楓青櫟生滿  
谷山鬼白日樵人遭窈窕陽臺彼神女朝朝暮暮能雲雨  
以雲爲衣月爲褚乘光服暗無留阻崑崙曾城道可取方

丈蓬萊多伴侶塊獨守此嗟何求况乃低徊夢中語

和王勝之雪霽借馬入省

泥水填馬不受轍无雪得火猶藏溝宿霧紛紛度城闕朔  
氣凜凜吹衣裘窮閣閉門無一客剝啄驚我有前騶強隨  
傳呼出屋去鼻息凍合髭繆繆投韁馬鬣任欹側欲出操  
箠手還抽行息江南悲故事溪谷冬暖花常流前年臘歸  
三見白霽色嶺上班班留杖藜此時將邑子登眺置酒身  
優游豈如都城今日事祇恐一蹶爲親憂因知田里駕欵  
段昔人豈卽非良謀君家洛陽名實大談笑枯槁回春柔  
平生意氣故應在白髮未敢相尋求從容退食想佳節豈  
無歌聲相獻酬奈何亦作苦寒調歎息朝夕無驕驕超然  
遂有江湖意滿紙爲我書窮愁相如正應居客右子路且



莫乘桴浮

和吳沖卿鵝鳴樹石屏

寒林昏鴉相與還下有跂石蒼屏顏曾於古圖見髣髴已  
怪刀筆非人間君家石屏誰爲寫古圖所傳無似者鵝飛  
歷亂止且鳴林葉慘慘風煙生高齋日午坐中見意似落  
日空上行君詩雄盛付君手云此非人乃天巧嗟哉渾沌  
死乾坤至造作萬物醜妍巨細各有理問此誰主何其精  
恢奇譎詭多可喜人於其間乃復雕鑿刻畫出智力欲與  
造化追相傾拙者婆娑尚欲奮工者固已窮夸矜吾觀鬼  
神獨與人意異雖有至巧無所爭所以號山間埋沒此寶  
千萬歲不爲見者驚吾又以此知妙偉之作不在百世後  
造始乃與元氣并畫工粉墨非不好歲久剝爛空留名能

從太古到今日獨此不朽由天成世人尚奇輕貨力山珍  
海怪採掇今欲索此屏後出爲君得胡賈欲價著不識吾  
知金帛不足論當與君詩兩相直

送李宣叔倅漳州

關山到漳窮地與南越錯山川鬱霧毒瘴癘春冬作荒茅  
篁竹間蔽虧有城郭居人特鮮少市井宜蕭索野花開無  
時蠻酒持可酌窮年不用客誰與分杯杓朝廷尚賢俊磊  
砢充臺閣君能喜節行文藝又該博超然萬里去識者爲  
不樂予聞君子居自可救民瘼苟能禦外物得地無美惡  
似聞最南方北客今勿藥林麓換風氣獸虵凋毒蠹如漳  
猶近州氣冷又銷鑠珍足海物味其厚不爲薄章舉馬甲  
柱固已輕羊酪蕉黃荔子丹又勝楂梨酢逢衣比多士往



往在丘壑從容與笑語豈不慰寂寞太守好觴詠嘉賓應  
在幕想卽有新詩流傳至京洛

韓持國從富并州辟

韓侯冰玉人不可塵土襍官雖衆俊後名字久訶益并州  
天下望撫士威愛愜千金棄不惜賓客常滿閣遙聞餘風  
高爲子置一榻親交西門餞百馬驕襍選子材宜用世談  
者爲嗚嗚矧今名主人氣力足呵欲推賢爲時輔勢若朽  
易拉會當薦還朝立子在閭闔惜哉秣騏驥賦以升龔合  
咨予栖栖者氣象已摧塌他年佐方州說將尚不納况於  
聲勢尊豈易取酬答有如持寸莛未足感鞿鞞顧於山水  
間意願多所合匡廬與韶石少小已嘗躡風遊會稽春雲  
宿天柱臘淮湖江海上慣食蝦蟹蛤西南窮岷嶓東北盡  
濟潔身雖未嘗歷魂夢已稠沓荆溪最所愛映燭多廟塔  
溪果點丹漆溪花團繡毳扁舟信所過行不廢樽榼一從  
捨之去霜雪行滿領息之不能寐蹙若蚩蚩喙方將築其  
濱畢景謝尊嗜安能孤此意顛倒就衰颯唯子余所嚮嗜  
好比鷓鴣何時歸相過遊屐尚可蠟

寄王逢原

北風吹雲埋九垓草木零落空池臺六龍避逃不敢出地  
上獨有寒崔嵬披衣起行愁不惟歸坐把卷闔且開永懷  
古人今已矣感此近世何爲哉申韓百家燹火起孔子大  
道寒於灰儒衣紛紛欲滿地無復風焰空煤烺力排異端  
誰助我憶見夫子真奇材榷柙豫章槩白日祇要匠石聊  
穿裁我方官拘不得往子有閒暇宜能來晤言相與入聖



處一取萬古光芒廻

送襄如晦卽席分題

以黯然消魂惟別而已爲韻擬而字韻作

十月款水冰問君行何爲行不顧斗米自與五湖期平生  
湖上遊幽事畧能知此後君最樂窮年得游嬉彩鯨抗波  
濤風作鱗之而鳴鼓上洞庭笑看紅橘垂漠漠大梁下黃  
沙吹酒旗應憐故人愁回首一相思

吳長文新得顏公壞碑

魯公之書旣絕倫歲久更爲時所珍荒壇壞冢朽崖屋剝  
落風雨埋煨塵斷碑數尺誰所得點畫入紙完如新延陵  
公子好事者拓取持寄情相親六書篆籀數變改訓詁後  
世多失真誰初妄鑿妍與醜坐使學士勞骸筋堂堂魯公  
勇且仁出遇世難親經綸揮毫卓犖又驚俗豈亦以此誇

常民但疑技巧有天得不必勉強方通神詩歌甘棠美召  
伯愛惜蔽芾由息人時危忠誼常恨少寶此勿復令埋堙

悼四明杜醇

杜生四五十孝友稱鄉里隱約不外求耕桑有妻子藜杖  
牧雞豚筠筒釣魴鯉歲時沽酒歸亦不乏甘旨天涯一杯  
飯夙昔相逢喜談辭足詩書篇詠又清泚都城問越客安  
否常在耳日月未渠央如何棄予死古風久凋零好學少  
爲已悲哉四明山此士今已矣

哭梅聖俞

詩行於世先春秋國風變衰始柏舟文辭感激多所憂律  
呂尚可諧鳴球先王澤竭士已偷紛紛作者始可羞其聲  
與節急以浮真人當天施再流篤生梅公應時求頌歌文



武功業優經奇緯麗散九州衆皆少銳老則不翁獨辛苦  
不能休惜無采者人名適貴人憐公青兩眸吹噓可使高  
岑樓坐令隱約不見收空能乞錢助饋餽疑此有物司諸  
幽棲棲孔孟葬魯鄒後始卓犖稱軻丘聖賢與命相楮牙  
勢欲強達誠無由詩人况又多窮愁李杜亦不爲公侯公  
窺窮阨以身投坎壈坐老當誰尤吁嗟豈卽非善謀處豹  
雖死皮終留飄然載喪下陰溝粉書軸幅懸無旒高堂萬  
里哀白頭東望使我商聲謳

別孫莘老

逢原未熟我已與子相知自吾得逢原知子更不疑把手  
湖上舟望子欲歸時茫然乃分散獨背東南馳寥寥西城  
居邂逅與子期雞鳴入省門朱墨來紛披含意不自得強  
顏聊爾爲會合常在夜青燈照書詩往往並余語至明不  
言疲忽忽捨我去使我當從誰送子不出門我身方羈縻  
我心得自如今與子相隨隨子在湖上逢原所嘗嬉想見  
荷葉盡北風卷寒漪已懷今日愁更念昔日悲相逢亦何  
有但有鏡中絲

示平甫弟

汴渠西受崑崙水五月奔湍射黃矢高淮夜入忽倒流礮  
岸相看欲生觜萬橋如山屹不動嗟我仲子行亦止自聞  
留連且一月每得問訊猶千里老工取河天上落伏礫澶  
沙卷無底土橋立馬望城東數日知有相逢喜牆隅返照  
媚槐穀池面過雨蘇篁葦欣然把手相與閑所願此時無  
一詭豈無他憂能老我付與天地從今始閉門爲謝載酒



人外慕紛紛吾已矣

送董伯懿歸吉州

我來以喪歸君至因謫徙蒼黃憂患中邂逅遇於此去年  
服初除聽赦相助喜看君數歸月但屈兩三指茫然冬更  
秋一笑非願始籃輿楊柳下明月芙蓉水僮飢屢闕門客  
罷方隱几是非評衆詩成敗斷前史時時對奕石漫浪爭  
生死送迎皆幅巾設席但陳米亦曾戲篇章揮翰疾蒿矢  
君豪才有餘我老憊先止東城景陽陌南望長干紫欲斲  
三畝蔬於焉寄殘齒經過許後日唱和猶在耳新恩忽捨  
我欣悵生彼已江湖北風帆捩楫卽千里相逢知何時莫  
惜縑與紙

明州錢君倚衆樂亭

使君幕府開東部名高海曲人知慕艤船談笑政卽成洗  
滌山川作嘉趣平泉浩蕩銀河注想見明星弄機杼載沙  
築成天上路投虹爲橋取孤嶼掃除荆棘水中央碧瓦朱  
甍隨指顧春風滿城金版舫來看置酒新亭上百女吹笙  
綵鳳悲一夫伐鼓靈鼉壯安期羨門相與遊方丈蓬萊不  
更求酒酣忽跨鯨魚去陳迹空令此地留

和平甫舟中望九華山二首

楚越千萬山雄奇此山兼盤根雖巨壯其末乃脩纖去縣  
尚百里側身勇前瞻蕭條煙嵐上縹緲浮青尖徐行稍復  
逼所矚亦已添精神去曹臺氣象來漸漸卸席取近岸移  
船傍蒼蘘窺觀坐窮晡未覺晷刻淹江空萬物息四面波  
瀾恬峩然九女鬢爭出一鏡險卧送秋月沒起看朝陽暹



游氛蕩無餘瑣細得盡規陵空翠燾直照影寒銘銘豕木  
立紺髮崖林張紫髯變態生倏忽雖神詎能占當留老吾  
身少駐誰云饜惜哉秦漢君黃屋上衡濤等之事嬉遊捨  
此何其廉我疑二后荒神物久已厭埋藏在雲霧不欲登  
昏儉又疑避褒封蔽匿以爲謙或是古史書脫落簡與籤  
當時備巡遊今不在緗縑終南秦之望泰山魯所詹天王  
與秩祭俎豆羅醢鹽苟能澤下民維此遠亦沾方今東南  
旱土脉燥不黏尚無膚寸功豈免竊食嫌神莽吾難知士  
病吾能破文章巧傳會智術工飛箱薦寶互珪璧論材自  
梗枘苟以飾婦妾謬云活蒼黔豈如幽人樂茲山謝閣閣  
穴石作戶牖垂泉當門簾尋奇出後徑覽勝倚前簷超然  
往不返舉世徒咕咕高興寄日月千秋伴烏蟾遐追商洛

翁秦火不能炎近慕楚穆生竟脫楚人紺吾意竊所尚人  
謀諒難僉

誰謂九華遠吾身未嘗詹唱篇每起予予口安能箝憶在  
秋浦北空江上新蟾光潔寫一鏡迴環雨堤奩露坐引衣  
襟風行欹帽簷維舟當此時巨細得盡瞻試嘗論大略次  
乃述微纖此山廣以深包畜萬物兼噓雲吐霧雨生育靡  
不漸巍然如九皇德澤四海沾此山相後先各出羣峰尖  
毅然如九官羅立在堂廉挺身百辟上附麗無姦儉此山  
高且寒五月不覺炎草樹萋已綠冰霜尚涵淹頽然如九  
老白髮連蒼髯此山當無雲秀色鬱以添婉然如九女靚  
飾出重簾珮環與巾裙紺玉青紈縑遠之妍西施近或醜  
無鹽變態不可窮詩者徒咕咕我初勇一往役世難安恬



浪荒不走職民瘼當誰砭乖離今數旬夢想欲窺覘自期  
得所如何帝釋囚鉗念昔太白巔下視海日暹榻來天柱  
遊屐齒尚苔黏猶之健飲食屢饗亦云饜胡爲慕攀踏已  
憊且不嫌豈其仁智心山水固所潛男兒有所學進退不  
在占功名苟不諧廊廟等閭閻况乃掄椽棧其誰辨梗枓  
歸歟巖崖居料理帶與籤得石坐兀兀逢泉飲厭厭取舍  
斷在獨豈必詢謀僉子語實慰我寧殊邑中黔玉枝將在  
山當倚以葭蒹詩力我已屈鋒鏖子猶銘扶復更一戰語  
汝其無謙

和中甫兄春日有感

雪釋沙輕馬蹄疾北城可遊今暇日濺濺溪谷水亂流漠  
漠郊原草爭出嬌梅過雨吹爛熳幽鳥迎陽語啾唧分香  
欲滿錦樹園剪絲休開寶刀室胡爲我輩坐自苦不念茲  
時去如失飽聞高逕動車輪甘卧空堂守經帙淮蝗蔽天  
農久餓越卒圍城盜少逸至尊深拱罷簫韶元老相看進  
刀筆春風生物尚有意壯士憂民豈無術不成歡醉但悲  
歌回首功名古難必

寄曾子固

吾少莫與合愛我君爲最君名高山嶽嶂崑崙與太低心  
收養友似不讓塵壒又如滄江水不逆溝畎澮君身揭日  
月遇輒破氛靄我材特窮空無用補倉廩謂宜從君久垢  
污得洮汰人生不可必所願每顛沛乖離五年餘牢落千  
里外投身落俗甯薄宦自鉗欵平居每自守高論從誰可  
搖搖西南心夢想與君會思君挾奇璞願售無良僧窮閭



抱幽憂凶禍費禳禱州窮吉士少誰可塔諸妹仍聞病連  
月醫藥誰可賴家貧奉養狹誰與通貨貝詩人刺曹公賢  
者荷戈殺奈何遭平時德澤盛汪濊鸞鳳鳴且下萬羽來  
翩翩吻吻林間鹿爭出噬苹蕓乃令高世士動輒遭狼狽  
人事既難了天理尤茫昧聖賢多如此自古云無奈周人  
貴婦女扁鵲名醫滯今世無常勢趨舍唯利害而君信斯  
道不閔身窮泰弃捐人間樂濯耳受天籟諒知安肥甘未  
宜顧糠糲龍螭雖蟠屈不慕虵蟻蛻令人重感奮意勇忘  
身藁何由日親炙病體同砭艾功名未云合歲月尤須悒  
懷息切劇効中夜淚霏霏君常許過我早晚治車軼山溪  
雖峻惡高眺發蒙眸峰巒碧參差木樹青掩藹桐江路尤  
駛飛槩下鳴瀨魚村指暮火酒舍瞻晨旆清醪足消憂玉  
鯽行可膾行行願無留日夕佇傾蓋會將見顏色不復謀  
蒼蔡延陵古君子議樂耻言鄙細事豈足論故欲論其大  
披披發韃橐懔懔見戈銳探深犯嚴壁破惑翻強旆離行  
步荃蘭偶坐陰松檜宵牀連衾幃晝食共麕羈茲歡何時  
合清瘦見衣帶作詩寄微誠誠語無絲繪

有感

憶昔與胡子戲娛西城幽放斥僕與馬獨身步田疇牛豎  
歌我旁聽之爲久留一接田父語嘆之勝王侯追逐恨不  
恣暮歸輒懷愁顧常輕千乘祇願足一丘子時怪我少好  
此寂寞遊笙篁不入耳又不甘醪羞那知抱孤傷罷頓不  
能適世味已鮮少但餘野心稠乖離今十年班髮滿我頭  
昔興亦略盡食眠常百憂每逢佳山水欲往輒復休方壯



遂如此况乃高春秋

白紵山

白紵衆山頂江湖所縈帶浮雲卷晴明可見九州外肩輿  
上寒空置酒故人會峰巒帳錦繡草木吹竽籟登臨信地  
險俯仰知天大留歡薄日晚起視飛鳥背殘年苦局束往  
事嗟摧壞歌舞不可求桓公井空在

九井

得盈字

沿崖涉澗三十里高下犖确無人耕捫蘿挽葛到山趾仰  
見吹瀉何崢嶸餘聲投林欲風雨來勢卷土猶溪阮飛蟲  
凌兢走獸慄霜雪夏落雷冬鳴野人往往見神物鱗甲漠  
漠雲隨行我來立久無所得空數石上菖蒲生中官繫龍  
沉玉册小吏磔狗澆銀觥地形偶爾藏險怪天意未必司  
陰晴山川在理有崩竭丘壑自古相虛盈誰能保此千世  
後天柱不折泉常傾

書會別亭

西城路居人送客西歸處年年借問去何時今日扁舟從  
此去春風吹花落高枝飛來飛去不自知路上行人亦如  
此應有重來此處時

張氏靜居院

動者利進爲靜者樂止居物性有偏得惟賢時卷舒張侯  
始出仕所至多名譽老矣歸偃休買地斲荒蕪屋成爲令  
名名實與時俱南堂棲幽真晨起瞻像圖北堂畫五禽游  
戲養形軀燕有諸賓庭學有諸子廬問侯年幾何矯矯八  
十餘問侯何能爾心不藏憂愉問侯客何爲弦歌飲投壺



問侯兒何讀夏商及唐虞高山填門戶洛水遶階除疾於  
山水間結駟有通衢我念老退者古多賢大夫留侯亦養  
生乃欲凌空虛閉門不飲酒豈異山中臞疎傳稍喜客揮  
金能自娛不聞喜教子滿屋青紫朱張侯能兼取勝事古  
所無褒稱有樂石丞相爲之書而我不自量聞風亦歌呼

禿山

吏役滄海上瞻山一停舟怪此禿誰使鄉人語其由一狙  
山上鳴一狙從之遊相匹乃生子子衆孫還稠山中草木  
盛根實始易求攀挽上極高屈指亦窮幽衆狙各豐肥山  
乃盡侵牟攘爭取一飽豈暇議藏收大狙尚自苦小狙亦  
已愁稍稍受咋嚙一毛不得留狙雖巧過人不善操耒耨  
所嗜在果穀得之常以偷嗟此海山中四顧無所投生生

未云已歲晚將安謀

杭州修廣師法喜堂

浮屠之法與世殊洗滌萬事求空虛師心以此不挂物一  
堂收身自有餘堂陰置石雙嶠嶼石脚立竹青扶疎一來  
已覺肝膽豁况乃宴坐窮朝晡憶初救時勇自許壯大看  
俗尤崎嶇豐車肥馬載豪傑少得志願多憂虞始知進退  
各有理造次未可分賢愚會將築室返耕釣相與此處吟

山湖

復至曹娥堰寄剡縣丁元珍

溪水渾渾來自北千山抱水清相射山深水急無艇子欲  
從故人安可得故人昔日此水上罇酒扁舟慰行役津亭  
把手坐一笑我喜滿懷君動色論新講舊惜未足落日低



何已催客離心自醉不復飲秋果寒花空滿席今年却坐  
相逢處悵悵難求別時迹可憐溪水自南流安得溪船問  
消息

寄贈胡先生 并序

孔孟去世遠矣信其聖且賢者質諸書焉耳翼之先生  
與予並世非若孔孟之遠也聞薦紳先生所稱述又詳  
於書不待見而後知其人也歎慕之不足故作是詩

先生天下豪傑魁曾臆廣博天所開文章事業望孔孟不  
復睥睨蔡與崔十年留滯東南州飽足藜藿安蒿萊獨鳴  
道德驚此民民之間者源源來高冠大帶滿門下奮如百  
蟄乘春雷惡人沮服善者起昔時躊躇今騫回先生不試  
乃能爾誠令得志如何哉吾願聖帝營太平補葺廊廟枝

頽頽披旒發纒廣耳目照徹山谷多遺材先收先生作梁  
柱以次構架桷與榱羣臣面向帝深拱仰戴堂陛方崔嵬

得曾子固書因寄

始吾居揚日重問每見及云將自親側萬里同講習子行  
何舒舒吾望已汲汲窮年夢東南顏色不可拖仁賢豈欺  
我正恐事維繫嚴親抱憂衰生理賴以給不然航江外天  
寒北風急無乃山路惡僕弱馬行澁孤懷未肯開歲物忽  
如螿竭來高郵住巷屋頗卑濕蓬蒿稍芟除茅竹隨補葺  
苟云禦風氣尚恐憂雨汗故人莫在眼屢獨開巾笈忠信  
蓋未見吾敢誣茲邑出關誰與語念子百憂集眺聽聊自  
放日暮城頭立徐歸坐當戶使者操書入時開識子意如  
渴得美湑驪駒日就道玉手行可執舊學待鐫磨新文得



刪拾重登城頭望喜氣滿原隰

憶昨詩示諸外弟

憶昨此地相逢時春入窮谷多芳菲短垣困困冠翠嶺躑  
躑萬樹紅相圍幽花媚草錯雜出黃蜂白蝶參差飛此時  
少壯自負恃意氣與日爭光輝乘閒弄筆戲春色脫畧不  
省旁人譏坐欲持此博軒冕言孔孟猶寒飢丙子從親  
走京國浮塵全並緇人衣明年親作建昌吏四月挽船江  
止磯端居感慨忽自寤青天閃爍無停暉男兒少壯不樹  
立挾此窮老將安歸吟哦圖書謝慶吊坐室寂寞生伊威  
材疎命賤不自揣欲與稷契遐相希晏天一朝畀以禍先  
子泯沒予誰依精神不離肝肺絕管血被面無時晞母兄  
呱呱泣相守三載厭食鍾山薇屬國降詔起羣彥遂自下

國趨王畿刻章琢句獻天子鈞取薄祿歡庭闈身着青衫  
手持版奔走卒歲官淮沂淮沂無山四封痺獨有廟塔尤  
峩巍時時憑高一悵望想見江南多翠微歸心動蕩不可  
抑霍若猛吹翻旌旂騰書漕府私自列仁者惻隱從其所  
暮春三月亂江水勁櫓健帆如轉機還家上堂拜祖母奉  
手出涕縱橫揮出門信馬向何許城郭宛然相識稀永懷  
前事不自適却指舅館排山扉當時髻兒戲我側于今冠  
佩何頎頎况復丘樊滿秋色蜂蝶摧藏花草腓令人感嗟  
千萬緒不忍倉卒回驂駢留當開樽強自慰邀子劇飲毋  
予違

東臯

起伏晴雲徑縱橫暖水陂草長流翠碧花遠沒黃鸝楚製



從人笑吳吟得自怡東臯興不淺游走及芳時

歲晚

月映林塘澹風含笑語涼俯窺憐淨綠小立佇幽香攜幼  
尋新韻扶衰坐野航延緣久未已歲晚惜流光

半山春晚卽事

春風取花去酬我以清陰翳翳陂路靜交交園屋深牀敷  
每小息杖屨或幽尋惟有北山鳥經過遺好音

歇眠

翠幙卷東岡歇眠月半牀松聲悲永夜荷氣馥初涼清話  
非無寄幽期故不忘扁舟亦在眼終自懶衣裳

定林

漱甘涼病齒坐曠息煩襟因脫水邊屨就敷巖上衾但留

雲對宿仍值月相尋真樂非無寄悲蟲亦好音

送張宣義之官越幕

會稽遊宦鄉海物錯句章土潤箭萌美水甘茶串香今君  
誠暫屈他日恐難忘唯有西興渡靈胥或怒張

送鄧監簿南歸

不見驪塘路茫然四十春長爲異鄉客每憶故時人水閣  
公三世雲浮我一身濠梁送歸處握手但悲辛

卽事

徑暖草如積山晴花更繁縱橫一川水高下數家村靜憩  
雞鳴午荒尋犬吠昏歸來向人說疑是武陵源

示耿天籟

挾策能傷性捐書可盡年弦歌無舊習香火有新緣白土



長岡路朱湖小洞天望公時顧我於此暢幽情

北山暮歸示道人

千山復萬山行路有無間  
花發蜂遞繞果垂猿對攀  
獨尋寒水度欲趁夕陽還  
天黑月未上兒童初掩關

烏塘

地僻居人少山稠伏獸多  
怒狸朝搏鴈嚙虎夜窺騾  
籬落生孫竹門庭上女蘿  
未應悲寂寞六載一經過

欲歸

水漾青天暖沙吹白日陰  
塞垣春錯莫行路老侵尋  
綠稍還幽草紅應動故林  
留連一杯酒滿眼欲歸心

壬辰寒食

客息似楊柳春風千萬條  
更傾寒食炭欲張冶城朝  
巾髮

雪爭出鏡顏朱早雕未知軒冕樂但欲老漁樵

宿雨

綠攬寒蕪出紅爭暖樹歸  
魚吹塘水動雁拂塞垣飛  
宿雨驚沙盡晴雲晝漏稀  
却愁春夢短燈火著征衣

題友人郊居水軒

田中三畝宅水上一軒開  
爲有漁樵樂非無仕進媒  
槎頭收晚釣荷葉卷新醅  
坐說魚腴美功名挽不來

江亭晚眺

日下崦嵫外秋生沆碣間  
清江無限好白鳥不勝閑  
雨過雲收嶼天空月上灣  
歸鞍侵調角回首六朝山

自白土村入北寺二首

木杪田家出城陰野逕分溜渠  
行碧玉畦稼卧黃雲薄槿



胭脂染深荷水麝焚夕陽人不見雞鶩自成羣  
雨過百泉出秋聲連衆山獨尋飛鳥外時渡亂流間坐石  
偶成歇看雲相與還會須營一畝長此聽潺湲

題朱郎中白都莊

蕭灑桐廬守滄洲寄一廬山光隔釣岸江氣雜炊煙藜杖  
聽鳴觴籃輿看種田明時須共理此興在他年

次韻冲卿過睢陽

宮廟此神鄉留親泊楚艦天開今壯麗地積古悲涼不改  
山河舊猶餘草木荒還聞足賓客誰是漢鄒陽

崑山慧聚寺次張祐韻

峰嶺互出沒江湖相吐吞園林浮海角臺殿擁山根百里  
見漁艇萬家藏水村地偏來客少幽興祇桑門

吳江

莽莽昔登臨秋風一散襟地留孤嶼小天入五湖深柑橘  
無千里魚鰕有萬金吾雖輕范蠡終欲此幽尋

世事

世事一何稠論心日已偷尚蒙今士笑宜見古人羞老圃  
聊須問良田亦欲求非關畏黻冕無責易身修

寄純甫

塞上無花草飄風急我歸稍林聽澗落卷土看雲飛想子  
當紅藥息家上翠微江寒亦未已好好着春衣

招丁元珍

默默不自得紛紛何所爲畫墁聊取食獵較且隨時秋入  
江湖暗風生草樹悲黃花一杯酒思與故人持



江上二首

潮連風浩蕩沙引客淹留落日更清坐空江無近舟共看  
蒹葭宅聊卽稻梁謀未敢嗟艱食凶年半九州  
書自江邊使鄉隣病餓稠何言萬里客更作百身憂補敗  
今誰卹趨生我自羞西南雙病眼落日倚扁舟

暮春

春期行晚晚春意賸芳菲曲水應修禊披香未試衣雨花  
紅半墮煙樹碧相依悵望夢中地王孫底不歸

送鄆州知府宋諫議

盛世千齡合宗工四海瞻天心初額俊雲翼首離潛德望  
完圭角儀形壯陞廉徐鳴蒼玉佩盡校碧牙籤綸掖清光  
注鑿坡茂渥霑文明誠得主政瘼尚頌辰右府參機務東

塗贊景炎廟謨資石畫兵畧倚珠鈴坐鎮均勞逸齋居養  
智恬謳謠喧井邑惠化穆蒼鷲進律朝章舊疏恩物議僉  
通班三殿遂徙部十城兼申甫周之翰龜蒙魯所詹地靈  
奎宿照野沃汶河漸首路龍旗盛提封虎節嚴賜衣纏紫  
艾衛甲綴朱綬海谷移文省繁堂燕豆添班春回紺幘問  
俗卷彤襜舟楫商巖命熊羆渭水占治裝行入覲金鼎重  
調鹽

歲晚懷古

先生歲晚事田園魯叟遺書廢討論問訊桑麻憐已長按  
行松菊喜猶存農人調笑追尋壑稚子歡呼出候門遙謝  
載醪祛惑者吾今欲辨已忘言

知段氏園亭



欹眠隨水轉東垣一點炊煙映水昏漫漫芙蓉難覓路  
翛翛楊柳獨知門青山呈露新如染白鳥嬉游靜不煩  
朱雀航邊今有此可能搖蕩武陵源

次韻致遠木人洲

迷子山前漲一洲木人圖志失編收年多但有柳生肘地  
僻獨無茅蓋頭河側鮑生乾尚立江邊屈子槁將投未妨  
他日稱居士能使君疑福可求

次韻酬龔深甫

握手東岡雪滿簪後期惆悵老吳蠶芳辰一笑真難值暮  
齒相息豈久堪他日杜詩傳渭北幾時周宅對漳南百年  
邂逅能多少且可勤來共草菴

次韻酬朱昌叔三首

點也白殊由與求既成春服更何憂拙於人合日天合靜  
與道謀非食謀未愛京師傳谷口但知鄉里勝壺頭嗟予  
老矣無一事復得此君相與游

去年音問隔淮州百謫難知亦我憂前日杯盤共江渚一  
歡相屬豈人謀山蟠直瀆輸淮口水抱長干轉石頭乘興  
舟輿無不可春風從此與公遊

烏榜登臨興未休共言何許更消憂聯裾蕭寺尋真覺方  
駕孫陵弔仲謀語罷每開歡笑口詩來仍掉苦吟頭已知  
軒冕真吾累且可追隨馬少游

次韻送程給事知越州

千騎東方占上頭如何誤到北山遊清明若覩蘭亭月暖  
熱因忘蕙帳秋投老始知歡可惜通宵豫以別爲憂西歸



定有詩千首想官重來賁一丘

次韻酬徐仲元

投老逍遙此與堂天刑真已脫桁楊緣源靜翳無魚淥度  
谷深追有鳥顏每苦交遊尋五柳最嫌尸祝擾庚桑相看  
不厭唯夫子風味真如顧建康

送程公闢得謝歸姑蘇

東歸行路歎賢哉碧落新除寵上才白傅林塘傳畫去吳  
王花鳥入詩來唱酬自有微之在談笑應容逸少陪少保元絳

謝事居姑蘇又王中甫善歌詞與相唱酬燕集除此兩翁相見外不知三選為誰

開

登寶公塔

倦童疲馬放松門自把長筇倚石根江月轉空為白晝嶺

雲分暝與黃昏鼠搖岑寂聲隨起鷓鴣嬌荒寒影對翻當此  
不知誰客主道人忘我我忘言

重登寶公塔復用前韻

空見方墳涌半霄難將生死問參寥應身東返知何國瑞  
像西歸自本朝遺寺有門非輦路故池無鉢但僧瓢獨龍  
下視皆陳迹追數齊梁亦未遙

紙暖閣

聯屏蓋障一尋方南設鈎簾北置牀側座對敷紅絮暖仰  
牕分啓碧紗涼擅廬易以梅烝壞錦幄終於草野妨楚穀  
越藤真自稱每糊因得減書囊

小姑

小姑未嫁與蘭支何恨流傳樂府詩初學水仙騎赤鯉竟



尋山鬼從文狸續紛雲襦空棠檝綽約煙鬟獨桂旗弄玉  
有祠終或往飛瓊無夢故難知

呈陳和叔并序

嘉祐末和叔以集賢校理判登聞鼓院同知太常禮院  
皮場街有園數畝中置二椽輓衰丈北戶臨溝略約通  
街旁作小屋毀輜車爲蓋某以直集賢院爲三司度支  
判官以知制誥糾察在京刑獄同管勾三班院開度約  
飯車蓋下隨所有無坐卧輓上笑語常至夜如此三歲  
而和叔遭太夫人憂未幾某亦喪親以去時永昭陵  
尚未復土也後與和叔皆蒙今上拔用數會議語皆憂  
傷之餘責厚事叢無復故情元豐元年某食觀使祿居  
鍾山南和叔經略廣東道舊悵然某作詩以叙其事

毀車爲屋僅容身三歲相要薄主人晝寓椽輓常至夜冬  
沿溝約復尋春南咳不洎公歸里蒼墓垂成我喪親後會  
縱多無此樂山林投老一傷神

全椒張公有詩在北山西庵僧者墁之悵然有感

十年悵悵躡山阡終欲持杯滴到泉東路角巾非故約西  
州華屋漫修椽幽明永隔休炊黍真俗相妨久絕弦遺墨  
每看疑邂逅復隨人事散如煙

讀眉山集次韻雪詩二首

若木昏昏未有鴟凍雷深閉阿香車搏雲忽散篔爲屑翦  
水如分綴作花擁箒尚憐南北巷持杯能喜兩三家戲接  
弄掬輸兒女羔袖龍鍾手獨叉

戲搖微縞女鬟鷗試咀流酥已頰車歷亂稍埋水揉粟消



沉時點水圓花豈能解艤真尋我且與蝸牛獨卧家欲挑  
青腰還不敢直須詩膽付劉叉

次韻奉和蔡樞密南京種山藥法

蔡詩并序云蒙見

并以生頭數十莖送上輒成小詩青青正是中分天區  
種何妨試玉延即見引須緣夏木定知如躡薦冬筵  
種何妨試玉延即見引須緣夏木定知如躡薦冬筵  
自題還自媿擷苗應笑宋人然

區種拋來六七年春風條蔓想宛延難追老圃莠苔徑空  
對珍盤玳瑁筵嘉種忽傳河右壤靈苗更長關西偏故畦  
穿斲知何日南望鍾山一慨然

上巳聞苑中樂聲書事

苑中誰得從春游想見漸臺瓦欲流御水曲隨花影轉宮  
雲低繞樂聲留年華未破清明節日暮初回被襖舟更覺  
至尊思慮遠不應全為拙倡優

用樂道舍人韻書十日事呈樂道舍人聖從待制

東門人物亂如麻想見新羈照路華午鼓已傳三刻漏從  
官初賜一杯茶怒殿下催分首擾擾宮前聽賣花歸去  
莫言天上事但知呼客飲流霞

詳定試卷

童子常誇作賦工暮年羞悔有楊雄當時賜帛倡優等今  
日論才將相中細甚客卿因筆墨早於爾雅注魚蟲漢家  
故事真當改新詠知君勝弱翁

奉酬楊樂道

邂逅聯裾殿閣春却愁容易即離羣相知不必因相識所  
得如今過所聞近代聲名出盧駱前朝筆墨數淵雲與公  
家世由來事愧我初無百一分



送李質夫之陝府

平世求才漫至公悠悠羈旅士多窮十年見子尚短褐千  
里隨人今北風戶外屢貧虛自滿樽中酒賤亦常空共嫌  
欲老無機械心事還能與我同

次韻吳季野題岳上人澄心亭

高亭五月尚寒生回首塵沙自鬱蒸砌水亂流穿石底檻  
雲高出蔽山層躋攀欲絕人間世締構知從物外僧腸胃  
坐來清似洗神奇未怪佛圖澄

莫言送彥珍

挾篋窮鄉滿鬢絲陂田荒盡豈嘗窺未應谷口終身隱正  
合菑川舉國推握手百憂空往事還家一笑卽芳時柘岡  
定有辛夷發亦見東風使我知

寄張先郎中

留連山水住多時年比馮唐未覺衰篝火尚能書細字郵  
筒還肯寄新詩胡牀月下知誰對蠻榼花前想自隨投老  
主恩聊欲報每瞻高躅恨歸遲

寄黃吉甫

朱顏去似朔風驚白髮多於野草生挾筴讀書空有得求  
田間舍轉無成解鞍烏石岡邊坐攜手辛夷樹下行今日  
追思真樂事黃塵深處走鷄鳴

卽席次韻徵之泛舟

畫舸幽尋北果園應將陳迹問桑門地隨牆墅行多曲天  
著岡巒望易昏故國時平空有木荒城人少半爲村悠悠  
興廢皆如此賴付乾愁酒一樽



示長安君

少年離別意非輕老去相逢亦愴情  
草草杯盤供笑語昏昏燈火話平生  
自憐湖海三年隔又作塵沙萬里行  
欲問後期何日是寄書應見雁南征

次韻微之卽席

釀成吳米野油囊却愛清談氣味長  
閑日有僧來北阜平時無盜出南塘  
風亭對竹酬孤峭雪逕尋梅認暗香  
江水中澗應未變一杯終欲就君嘗

息王逢原三首

布衣阡陌動成羣卓犖高才獨見君  
杞梓豫章蟠絕壑騏驎屢褭跨浮雲  
行藏已許終身共生死那知半路分  
便恐世間無妙質真難從此罷揮斤

蓬蒿今日想紛披冢上秋風又一吹  
妙質不爲平世得微言唯有故人知  
廬山南墮當書案溢水東來入酒卮  
陳迹可憐隨手盡欲歡無復似當時  
百年相望濟時功歲路何知向此窮  
鷹隼奮飛凰羽短騏驎埋沒馬羣空  
中郎舊業無兒付康子高才有婦同想見  
江南原上墓樹枝零落紙錢風

季春上旬苑中卽事

輦路行看斗柄東簾垂殿閣轉春風  
樹林隱翳燈含霧河漢欹斜月墜空  
新葢漫知紅簌簌舊山常夢直叢叢  
賞心樂事須年少老去應無日再中

與微之同賦梅花得香字三首

漢宮嬌額半塗黃粉色凌寒透薄妝  
好借月魂來映燭恐



隨春夢去飛揚風亭把盞酬孤豔雪徑回輿認暗香不爲  
調羹應結子直須留此占年芳

結子非貪鼎鼎嘗偶先紅杏占年芳從教臘雪埋藏得却  
怕春風漏洩香不御鉛華知國色祇栽雲縷想仙裝少陵  
爲爾牽詩興可是無心賦海棠

淺淺池塘短短牆年年爲爾惜流芳向人自有無言意傾  
國天教抵死香鬢裊黃金危欲墮帶團紅蠟巧能裝嬋娟  
一種如冰雪依倚春風笑野棠

區區隨傳換冬春夜半懸崖託此身豈慕王遵能許國直  
緣毛義欲私親施爲已壞生平學夢想猶歸寂寞濱風月  
一歌勞者事能明吾意可無人

送遜師歸舒州

山川相對一悲翁往事紛紛夢寐中邂逅故人恩意在低  
徊今日笑言同看吹陌上楊花滿忽憶巖前蕙帳空亦見  
桐鄉諸父老爲傳衰颯病春風

次韻酬宋玘二首

洗雨吹風一月春山紅漫漫綠紛紛褰裳遠野誰從我散  
策空陂忽見君青眼坐傾新歲酒白頭追誦少年文因嗟  
涉世終無補久使高材雍上聞

山陂疇昔從吾親諸父先生各佩紛零落長年誰語此遲  
回故地却逢君衣冠偶坐論經術襁褓當時刺繡文更怪  
高材終未遇有司何日遷方聞

夢張劔州



萬里憐君蜀道歸相逢似喜語還悲  
江淮別業依何處日月新阡卜幾時  
自說曲阿猶未穩卽尋湓水去猶疑  
茫然却是陳橋夢昨日春風馬上息

次韻張唐公馬上

揭節初悲力不任賜身終愧謬恩臨  
病來氣弱歸宜早偷取官多責恐深  
膏澤未施空謗怨瘡痍猶在豈謳吟  
黃昏信馬江城路欲訪何人話此心

上元戲呈貢父

車馬紛紛白晝同萬家燈火暖春風  
別開閭闔壺天外特起蓬萊陸海中  
盡取繁華供俠少祇分牢落與衰翁  
不知太乙遊何處定把青藜獨照公

和楊樂道見寄

宅帶園林五畝餘蕭條還似茂陵居  
殺青滿架書新繕生白當牕室久虛  
孤學自難窺奧密重言猶得慰空疎  
相慰每欲投詩社只待春蒲葉又書

次御河寄城北會上諸友

客路花時祇攬心行逢御水半晴陰  
背城野色雲邊盡隔屋春聲樹外深  
香草已堪回步履午風聊復散衣襟  
憶君載酒相追處紅萼青跗定滿林

寄友人三首

萬里書歸說我愁知君不忘北城幽  
一篇封禪才難學三畝蓬蒿勢易求  
欲與山僧論地券願爲鄰舍事田疇  
應須急作南征計漠北風沙不可留

水邊幽樹憶同攀曾約移居向此間  
欲語林塘迷舊逕却



隨車馬入他山飛花著地容難冶鳴鳥窺人意轉閑物色  
可歌春不返相思空復慘朱顏

一別三年至一方此身漂蕩只殊鄉看沙更覺蓬萊淺數  
日空驚霹靂忙渺渺水波低赤岸濛濛雲氣淡扶桑登臨  
舊興無多在但有浮槎意未忘

寄張諤招張安國金陵法曹

我老願爲臧丈人君今少壯豈長貧好須白致青冥上可  
且相從寂寞濱深谷黃鸝騎引于曲碕翠碧巧藏身尋幽  
觸靜還成興何必區區九陌塵

欲往淨因寄涇州韓持國

紫荆山下物華新只與都城共一春今節想君攜綠酒故  
情憐我踏黃塵涸魚已悔他年事搏虎方收末路身欲寄  
微言書不盡試尋僧閣望西人

送別韓處部

客舍街南初著巾與君兄弟卽相親當年豈意兩家子今  
日更爲同社人京洛風塵嗟阻濶江湖杯酒惜逡巡歸帆  
嶺北茫茫水把手何時寂寞濱

懷舒州山水呈昌叔

山下飛鳴黃栗留溪邊飲啄白符鳩不知此地從君處亦  
有他人繼我不塵土生涯休盪滌風波時事只飄浮相看  
髮禿無歸計一夢東南卽自羞

寄袁州曹伯玉使君

宜春城郭繞樓臺想見登臨把一盃濕濕嶺雲生竹籥冥  
冥江雨熟楊梅政成定入邦人詠詩就還隨驛使來錯莫



臨川詩集 卷之六 風沙愁病眼不知何日爲君開

再至京口寄漕使曹郎中

漂流曾落此江邊憶與詩翁賦浩然浩然堂名鄉國去身猶萬里驛亭分首已三年北城紅出高枝靚南浦青回老樹圓還似昔時風露好只疑談笑在君前

次韻平甫金山會宿寄親友

天末海門橫北回煙中沙岸似西興已無船舫猶聞笛遠有樓臺祇見燈山月入松金破碎江風吹水雪崩騰飄然欲作乘桴計一到扶桑恨未能

次韻再遊城西李園

京師花木類多奇常恨春歸人未歸車馬喧喧走塵土園林處處鏤芳菲殘紅已落香猶在羈客多傷涕自揮我亦悠悠無事者約君聯騎訪郊圻

予求守江陰未得酬昌叔憶江陰見及之作

黃田港北水如天萬里風檣看賈船海外珠犀常入市人間魚蟹不論錢高亭笑語如昨日末路塵沙非少年強乞一官終未得祇君同病肯相憐

奉寄子思以代別

南北蹉跎成兩翁悲歡邂逅笑言同全家欲出嶺雲外匹馬肯尋山雨中趨府折腰嗟踽踽聽泉分手惜怱怱寄聲但有加餐飯才業如君豈久窮

留題微之廨中清輝閣

故人名字在瀛洲邂逅低回向此留鷗鳥一雙隨坐笑荷花十丈對冥搜水涵樽俎清如洗山染衣巾翠欲流宣室



臨川詩集 三十九  
應疑鬼神事知君能復幾來游

元珍以詩送綠石硯所謂玉堂新樣者

玉堂新樣世爭傳况以巒溪綠石鐫嗟我長來無異物愧  
君持贈有佳篇久埋瘴霧看猶濕一取春波洗更鮮還與  
故人袍色似論心於此亦同堅

金陵懷古四首

霸祖孤身取二江子孫多以百城降豪華盡出成功後逸  
樂安知與禍雙東府舊基留佛刹後庭餘唱落船窓黍離  
麥秀從來事且置興亡近酒缸  
天兵南下此橋江敵國當時藉顧降山水雄豪空復在君  
王神武自難雙留連落日頻回首想像餘墟獨倚窓却怪  
夏陽纜一葦漢家何事費罌缸

地勢東回萬里江雲間天闕古來雙兵纏四海英雄得聖  
出中原次第降山水寂寥埋王氣風煙蕭颯滿僧窓廢陵  
壞冢空冠劔誰復沾纓醉一缸

憶昨天兵下蜀江將軍談笑士爭降黃旗已盡年三百紫  
氣空收劔一雙破堞自生新草木廢宮誰識舊軒窓不須  
搔首尋遺事且倒花前白玉缸

次韻舍弟遇子固憶少述

時舍弟在臨川

歸計何時就一塵寒城回首意茫然野林細錯黃金日溪  
岸寬圍碧玉天飛兔已聞追駿褭太阿猶恨失龍泉遙知  
更憶河濱友從事能忘我獨賢

次韻答平甫

高蟬抱殼悲聲切新鳥爭巢諱語忙長樹老陰欺夏日晚



花幽豔敵春陽雲歸山去當簷靜風過溪來滿坐涼物物  
此時皆可賦悔予千里不相將

金明池

宜秋西望碧參差憶看鄉人襖飲時斜倚水開花有思緩  
隨風轉柳如癡青天白日春常好綠髮朱顏老自悲跋馬  
未堪塵滿眼夕陽偷理釣魚絲

葛溪驛

缺月昏昏漏未央一燈明滅照秋床病身最覺風露早歸  
夢不知山水長坐感歲時歌慷慨起看天地色淒涼鳴蟬  
更亂行人耳正抱疎桐葉半黃

泛舟青溪入水門登高齋奉呈康叔

簿領紛紛惜此時起攜佳客散沈迷十圍但見諸營柳九  
曲難尋故國溪牽埭欲隨流水遠放船終礙畫橋低子猷  
清興何曾盡想憶高齋更一躋

九日登東山寄昌叔

城上啼烏破寂寥思君何處坐岩巖應須綠酒醺黃菊何  
必紅裙弄紫簫落木雲連秋水渡亂山煙入夕陽橋淵明  
久負東籬醉猶分低心事折腰

寄吳成之

綠髮溪山笑語中豈知翻手兩成翁辛夷屋角搏香雪躑  
躅岡頭挽醉紅想見舊山茅徑在隨今日板輿空渭陽  
車馬嗟何及榮祿方當與子同

寄曾子固

斗粟猶慙報禮輕敢嗟吾道獨難行脫身負米將求志殘



力乘固豈爲名高論幾爲衰俗廢壯懷難值故人傾荒城  
回首山川隔更覺秋風白髮生

寄王回深甫

少年倏忽不再得後日歡娛能幾何顧我面顏衰更早憐  
君身世病還多牕間暗淡月含霧船底飄飄風送波一寸  
古心俱未試相息中夜起悲歌

寄闕下諸父兄兼示平甫兄弟

父兄爲學衆人知小弟文章亦自竒家勢到今宜有後士  
才如此豈無時久聞陽羨溪山好頗與淵明性分宜但願  
一門皆貴仕時將車馬過茅茨

鍾山西庵白蓮亭

山亭新破一方苔白帝留花滿四隈野豔輕明非傅粉秋  
光清淺不憑材鄉窮自作幽人伴歲晚誰爲靜女媒可笑  
遠公池上客却因松菊賦歸來

次韻舍弟賞心亭卽事

檻折簷傾野水傷臺城佳氣已消亡難披梗莽尋千古獨  
倚青冥望八荒坐覺塵沙昏遠眼忽看風雨破驕陽扁舟  
此日東南興欲盡江流萬里長

送張仲容赴杭州孫公辟

萬屋相誇漆與丹笑歌長在綺純間綵船春戲城邊水畫  
燭秋尋寺外山憶我屢隨遊客入喜君今赴辟書還遙知  
曼倩威行久赤筆應從到日閑

次韻春日卽事

人間尚有薄寒侵和氣先薰草樹心丹白自分齊破蕾青



黃相向欲交陰潺湲嫩水生幽谷漠漠輕煙動遠林病得一官隨太守班春無助愧周任

江上

村落家家有濁醪青旗招客解祗稠春風似補林塘破野水遙連草樹高寄食舟車隨處弊行歌天地此身勞遲回自負平生意豈是明時惜一毛

午枕

百年春夢去悠悠不復吹簫向此留野草自花還自落鳴禽相乳亦相酬舊蹊埋沒開新徑朱戶欹斜見畫樓欲把一盃無伴侶眼看興廢使人愁

寄石鼓寺陳伯庸

鯨海無風白日閑天門當面險難攀塵埃掉臂離長陌琴酒和雲入舊山仁義未饒軒冕貴功名莫信鬼神慳郭東一點英雄氣時伴君心夜斗間

姑胥郭

誤褫雲巾別故山抵吳由越兩間關千家漁火秋風市一葉歸舟暮雨灣旅病恹恹如困酒鄉愁脉脉似連環情知帶眼從前緩更恐顛毛自此斑

太湖恬亭

檻臨溪上綠陰圍溪岸高低入翠微日落斷橋人獨立水涵幽樹鳥相依清遊始覺心無累靜處誰知世有機更待夜深同徙倚秋風斜月釣船歸

次韻酬吳彥珍見寄

時彥珍爲教授學有右軍墨池

君作新詩故起予一吟聊復報雙魚杖藜高徑誰來往散



帙空堂自卷舒樹外鳥啼催晚種花間人語趁朝虛春風處處堪攜手何事臨池苦學書

自金陵如丹陽道中有感

數百年來王氣消難將前事問漁樵苑方秦地皆蕪沒山借揚州更寂寥荒埭暗雞催月曉空場老雉挾春驕豪華祇有諸陵在往往黃金出市朝

讀詔書

慶曆七年

去秋東出汴河梁已見中州旱勢強日射地穿千里赤風吹沙度滿城黃近聞急詔收羣策頗說新年又亢陽賤術縱工難自獻心憂天下獨君王

除夜寄舍弟

一尊聊有天涯憶百感翻然醉裏眠酒醒燈前猶是客夢回江北已經年佳時流落真何得勝事蹉跎只可憐唯有到家寒食在春風同泛潁溪船

送王補之行風忽作因題四句於舟中

淮口西風急君行定幾時故應今夜月未便照相思

離蔣山

出谷頻回首逢人更斷腸桐鄉豈愛我我自愛桐鄉

江上

江水漾西風江花脫晚紅離情被橫笛吹過亂山東

秣陵道中口占二首

經世才難就田園路欲迷慙慙將白髮下馬照青溪  
歲熟田家樂秋風客自悲茫茫曲城路歸馬日斜時

雜詠二首



證聖南朝寺三年到百回不知牆下路今日幾荷開  
桃李石城塲餉田三月時柴荆常自閉花發少人知

梅花

牆角數枝梅凌寒獨自開遙知不是雪爲有暗香來

歌元豐

豚柵雞埭晡曉霽間暮林搖落獻南山豐年處處人家好隨  
意飄然得往還

九日

九日無歡可得追飄然隨意歷山陂蔣陵西曲一作風塵  
慘一作澹也有黃花一兩枝

初晴

幅巾慵整露蒼華度隴深尋一徑斜小雨初晴好天氣晚

花殘照野人家

翛然

翛然三月閉柴荆綠葉陰陰忽滿城自是老年遊興少春  
風何處不堪行

竹裏

竹裏編茅倚石根竹莖疎處見前村閉眼盡日無人到自  
有春風爲掃門

隨意

隨意柴荆手自開沿岡度塹復登臺小橋風露扁舟月迷  
鳥羈雌竟往來

初夏卽事

石梁茅屋有彎碕流水濺濺度兩陂晴日暖風生麥氣綠



陰幽草勝花時

光宅寺

梁武帝宅也其北齊安隔淮齊武帝宅也宋

齊安孤起宋興前光宅相仍一水邊蜂分蟻爭今不見故  
窠遺堙尚依然

與寶覺宿龍華院絕句

舊有詩云京口瓜洲一水間  
鍾山只隔數重山春風自綠

世間投老斷攀緣忽憶東遊已十年但有當時京口月與  
公隨我故依然

自定林過西庵

午鷄聲不到禪林栢子煙中靜擁衾忽憶西巖道人語杖  
藜乘興得幽尋

謝安墩

我名公字偶相同我屋公墩在眼中公去我來墩屬我不  
應墩姓尚隨公

山陂

山陂院落今接種城郭樓臺已放燈白髮逢春唯有睡睡  
聞啼鳥亦生憎

北山有懷

香火因緣寄北山主恩投老更人間傷心躑躅岡頭路明  
日春風自往還

北陂杏花

一陂春水遶花身花影妖嬈各占春縱被春風吹作雪絕  
勝南陌碾成塵

江梅



臨川詩集 四十六  
江南歲盡多風雪也有江梅漏洩春顏色凌寒終慘澹不  
應搖落始愁人

北山

北山輪綠漲橫陂直塹回塘灩灩時細數落花因坐久緩  
尋芳草得歸遲

楊柳

楊柳杏花何處好石梁茅屋雨初乾綠垂靜路要深駐紅  
寫清波得細看

出郊

川原一片綠交加深樹冥冥不見花風日有情無處著初  
迴光景到桑麻

呈陳和叔

數椽生草覆莓苔

一作數椽半落長莓苔

一徑牆陰斲雪開玉匣囊

衣新徙舍杖藜從此爲君來

數椽庫屋茨生草三畝荒園種晚蔬永日終無一杯酒可  
能留得故人車

與耿天騫會話

邯鄲四十餘年夢相對黃梁欲熟時萬事祇如空鳥迹怪  
君強記尚能追

庚申正月遊齊安

水南水北重重柳山後山前處處梅未卽此身隨物化年  
年長趁此時來

庚申正月遊齊安有詩云水南水北重重柳壬戌正  
月再遊



招提詩壁漫黃埃忽忽籠紗雨過梅老值白雞能不死復隨春色破寒來

壬戌正月晦與仲元自淮上復至齊安

風暖柴荆處處開雪乾沙淨水洄洄意行却得前年路看盡梅花看竹來

悟真院

野水從橫漱屋除午牕殘夢鳥相呼春風日日吹香草山北山南路欲無

鍾山晚步

小雨輕風落棟花細紅如雪點平沙槿籬竹屋江村路時見宜城賣酒家

賀蘭溪洛京地名陳繹買地築居於

賀蘭溪上幾林松南北東西有幾峰買得住來今幾日尋常誰與坐從容

書湖陰先生壁

茆簷長掃靜無苔花木成畦手自栽一水護田將綠繞兩山排闥送青來

書何氏宅壁

有興提魚就公煮此言雖在已三年皖濤終負幽人約空對湖山坐惘然

示公佐

殘生傷性老耽書年少東來復起予各據槁梧同不寐偶然聞雨落堦除

送黃吉父將赴南康官歸金谿二首



柘岡西路白雲深想子東歸得重尋亦見舊時紅躑躅爲  
言春至每傷心

還家一笑卽芳辰好與名山作主人邂逅五湖乘興往相  
邀錦繡谷中春

金陵卽事三首

水際柴門一半開小橋分路入青苔背人照影無窮柳隔  
屋吹香併是梅  
結綺臨春歌舞地荒蹊狹巷兩三家東風漫漫吹桃李非  
復當時仗外花  
昏黑投林曉更驚背人相喚百般鳴柴門長閉春風暖事  
外還能見鳥情

鳥塘

鳥塘渺渺綠平隄隄上行人各有攜試問春風何處好辛  
夷如雪柘岡西

柘岡

萬事紛紛祇偶然老來容易得新年柘岡西路花如雪迴  
首春風最可憐

金陵

金陵陳迹老莓苔南北遊人自往來最憶春風石城塢家  
家桃杏過牆開

午枕

午枕花前簾欲流日催紅影上簾鉤窺人鳥喚悠颺夢隔  
水山供宛轉愁

州橋



州橋蹋月想山椒  
迴首哀湍未覺遙  
今夜重聞舊嗚咽  
却看山月話州橋

觀明州圖

明州城郭畫中傳  
尚記西亭一棹船  
投老心情非復昔  
當時山水故依然

和張仲通憶鍾陵二首

一夢章江已十年  
故人重見想皤然  
祇應兩岸當時柳  
能到春來尚可憐

逸少池邊有一丘  
西山南浦慣曾遊  
殘年歸去終無樂  
聞說章江卽淚流

鍾山卽事

澗水無聲繞竹流  
竹西花草弄春柔  
茅簷相對坐終日  
一鳥不鳴山更幽

隴東西二首

隴東流水向東流  
不肯相隨過隴頭  
祇有月明西海上  
伴人征戍替人愁

隴西流水向西流  
自古相傳到此愁  
添却征人無限淚  
怪來嗚咽已千秋

重將

重將白髮旁牆陰  
陳迹茫然不可尋  
花鳥總知春爛熳  
人間獨自有傷心

楚天

楚天如夢水悠悠  
花底殘紅漫不收  
獨遶去年揮淚處  
還將牢落對滄洲



送和甫至龍安微雨因寄吳氏女子

荒煙涼雨助人悲  
淚染衣巾不自知  
除却春風沙際綠  
一如看汝過江時

與北山道人

蒔果疏泉帶淺山  
柴門雖設要常關  
別開小徑連松路  
祇與鄰僧約往還

江寧夾口

落帆江口月黃昏  
小店無燈欲閉門  
側出岸沙楓半死  
繫船應有去年痕

夜直

金爐香燼漏聲殘  
翦翦輕風陣陣寒  
春色惱人眠不得  
月移花影上欄干

金陵報恩大師西堂方丈

蕭蕭出屋千竿玉  
靄靄當牕一炷雲  
心力長年人事外  
種花移石尚慇懃

獨卧

茆簷午影轉悠悠  
門閉青苔水亂流  
百轉黃鸝看不見  
海棠無數出牆頭

孟子

沉魄浮魂不可招  
遺編一讀想風標  
何妨舉世嫌迂濶  
故有斯人慰寂寥

臘享

明星慘澹月參差  
萬竅含風各自悲  
入散廟門燈火盡  
却尋殘夢獨多時



杏花

垂楊一徑紫苔封  
人語蕭蕭院落中  
獨有杏花如喚客  
倚牆斜日數枝紅

泊姚江

山如碧浪翻江去  
水似青天照眼明  
喚取仙人來住此  
莫教辛苦上層城

遊鍾山

兩山松櫟暗朱藤  
一水中開勝武陵  
午梵隔雲知有寺  
夕陽歸去不逢僧

杭州望湖樓回馬上作呈玉汝樂道

水光山氣碧浮浮  
落日將歸又少留  
從此祇應長入夢  
夢中還與故人遊

春日席上

十年流落負歸期  
臨水登山各有思  
今日樽前千萬恨  
不堪頻唱鷓鴣辭

戲贈育王虛白長老

白雲山頂病禪師  
昔日公卿各贈詩  
行盡四方年八十  
却歸荒寺有誰知

無錫寄正之

健席高橋送病身  
亂山荒隴障歸津  
應須一曲千回首  
西去論心更幾人

初晴

一抹明霞黯淡紅  
瓦溝已見雪花融  
前山未放曉寒散  
猶鎖白雲三兩峰



越人以幕養花因遊其下

尚有殘紅已可悲更憂回首祇空枝莫嗟身世渾無事睡  
過春風作惡時

鄞縣西亭

收功無路去無田竊食窮城度兩年更作世間兒女態亂  
栽花竹養風煙

序

世稱杜少陵聖於詩謂其包涵萬有而神力又足勝之  
也然其沈雄悲壯之辭礮落欵欵之氣亦由遭際時艱  
倥傯道路皇皇無廟堂片席之安故其詩益苦而工東  
坡之於詩也才力不減少陵而重以語言賈禍故浮沈  
仕宦得肆志而為詩於學贍於力專於情致也夸猶而  
傲放嗚呼此其與少陵異世頡頏歟夫前後詩人其祖  
述薪傳與夫標新領異者不可殫舉求所為博而該微  
而妙者舍先生無與歸至夫和韻諸什似戾古法而累  
章連牘實足駕元白皮陸而上之後邨謂宋詩非特比



唐殆將過矣此其說微袒而左若謂宋必不逮唐則無以服有宋諸公而先生更何能屈首降心也今其全詩具在足證高下是編之刻取其簡少易攜自註者存之艱澁确犖者置之亦善本也愛是編者與少陵詩合而求焉可乎禹航周之鱗雪蒼識



東坡詩鈔

蘇軾字子瞻一字和仲眉州眉山入嘉祐二年進士調福昌主簿對制策入三等除大理評事簽書鳳翔府判官入判登聞鼓院召試直史館丁父憂熙寧二年還朝判官告院權開封府推官出判杭州知密徐湖三州以爲詩謗訕逮赴臺獄謫黃州團練副使安置築室於東坡自號東坡居士移常州哲宗立復朝奉郎知登州召爲禮部郎中遷起居舍人尋除翰林學士兼侍讀拜龍圖閣學士出知杭州召爲翰林承旨數月知穎州揚州復召爲兵部尚書兼侍讀改禮部兼端明殿翰林侍讀兩學士出知定州紹聖初貶寧遠軍節度副使惠州安置又貶瓊州別駕居儋耳徽宗立移舒州團練副使徙



永州更三赦遂提舉玉局觀復朝奉郎建中靖國元年卒于常州年六十六南渡後贈太師謚文忠子瞻詩氣象洪濶鋪叙宛轉子美之後一人而已然用事太多不免失之豐縟雖其學問所益要亦洗削之功未盡也而世之訾宋詩者獨於子瞻不敢輕議以其胸中有萬卷書耳不知子瞻所重不在此也加之梅溪之註鬪釘其間則子瞻之精神反為所掩故讀蘇詩者汰梅溪之註并汰其過於豐縟者然後有真蘇詩也

辛丑十一月十九日既與子由別於鄭州西門之外

馬上賦詩一篇寄之

不飲胡為醉兀兀此心已逐歸鞍發歸人猶自念庭闈今我何以慰寂寞登高回首坡隴隔惟見烏帽出復沒苦寒

念爾衣裘薄獨騎瘦馬踏殘月路人行歌居人樂僮僕怪

我苦悽惻亦知人生要有別但恐歲月去飄忽寒燈相對

記疇昔夜雨何時聽蕭瑟君知此意不可忘慎勿苦愛高

官職嘗有夜雨對床之言故云爾

病中大雪數日未嘗起觀號令趙薦以詩相屬戲用

其韻答之

經旬卧齋閣終日親劑和不知雪已深但覺寒無奈飄蕭

窓紙鳴堆壓簷板墮關中皆以風颺助凝冽幃幔困掀

惟息近醇醲未敢窺璨瑳何時反炎赫却欲躬白磨誰云

座無羶尚有裘充貨西鄰歌吹發促席寒威挫崩騰踏成

逕繚繞飛入坐人歡瓦先融飲僞餅屢卧嗟余獨愁寂空

室自困珂欲為後日賞恐被遊塵凜寒更報新霽皎月



半破有客獨苦吟清夜默自課詩人例窮蹇秀句出寒歲  
何當暴雪霜度以躡郊賀

歲晚相與餽問爲餽歲酒食相邀呼爲別歲至除夜達  
且不眠爲守歲蜀之風俗如是余官岐下歲暮思歸而  
不可得故爲此三詩寄子由

### 餽歲

農功各已收歲事得相佐爲歡恐無具假物不論貨山川  
隨出產貧富稱小大真盤巨鯉橫發籠雙兔卧富人事華  
靡綵繡光翻座貧者餽不能微擊出春磨官居故人少里  
巷佳節過亦欲舉鄉風獨倡無人和

### 別歲

故人適千里臨別尚遲遲人行猶可復歲行那可追問歲

安所之遠在天一涯已逐東流水赴海歸無時東鄰酒初  
熟西舍蔬亦肥且爲一日歡慰此窮年悲勿嗟舊歲別行  
與新歲辭去去勿回顧還君老與衰

### 守歲

欲知垂盡歲有似赴壑蛇脩鱗已半沒去意誰能遮况欲  
繫其尾雖勤知奈何兒童強不睡相守夜謹諱晨雞且勿  
唱更鼓畏添樾坐久燈燼落起看北斗斜明年豈無年心  
事恐蹉跎努力盡今夕少年猶可誇

### 和子由踏青

春風陌上驚微塵遊人初樂歲華新人閑正好路旁飲麥  
短未怕遊車輪城中居人厭城郭喧闐曉出空四鄰歌鼓  
驚山草木動簞瓢散野鳥蒼馴何人聚衆稱道人遊道賣



符色怒瞋宜蠶使汝蠶如甕宜畜使汝羊如屠路人未必  
信此語強為買服禳新春道人得錢徑沽酒醉倒自謂吾  
符神

和子由蠶市

蜀人衣服常苦艱蜀人遊樂不知還千人耕種萬人食一  
年辛苦一春閑閑時尚以蠶為市其忘辛苦逐欣歡去年  
霜降所秋秋今年霜積如連山破瓢為輪土為釜爭買不  
翅金與純憶昔與子皆童卯年年廢書走市觀市人爭誇  
鬪巧智野人喑啞遭欺謾詩來使我感舊事不悲去國悲  
流年

和子由論書

吾雖不善書曉書莫如我苟能通 共意常謂不學可貌妍  
容有顰蹙美何妨楷端莊雜流駁 剛健含婀娜好之每自  
譏不謂子亦頗書成輒棄去繆被 旁人裹體勢本濶畧結  
束入細麼子詩亦見推語重未敢 荷邇來又學射力薄愁  
官笥官箭十二把吾能十一把箭耳多好竟無成不精安用夥何當盡屏  
去萬事付懶惰吾聞古書法守駿 莫如跛世俗筆苦驕衆  
中強蒐賊鍾張忽已遠此語與時 左

和子由寒食

寒食今年二月晦樹林深翠已生 煙遶城駿馬誰能借到  
處名園意盡便但挂酒壺那計盞 偶題詩句不須編忽聞  
啼鴉驚羈旅江上何人治廢田

石鼓

冬十二月歲辛丑我初從政見魯 叟舊聞石鼓今見之文



字鬱律蛟蛇走細觀初以指畫肚欲讀嗟如籍在口韓公  
 好古生已遲我今况又百年後強尋偏旁推點畫時得一  
 二遺八九我車既攻馬亦同其魚維鯁貫之柳其詞云我  
 馬既同又云其魚維何維鯁維鯁何以貫古器縱橫猶識  
 鼎眾星錯落僅名斗模糊半已似癡胝詰曲猶能辨跟肘  
 娟娟缺月隱雲霧濯濯嘉禾秀莨秀漂流百戰偶然存獨  
 立千載誰與友上追軒頡相唯諾下揖米斯同穀穀憶昔  
 周宣歌鴻雁當時籀史變蝌蚪厭亂人方思聖賢中興天  
 為生耆耆東征徐虜闕虓虎北伏犬戎隨指喉象骨雜沓  
 貢狼鹿方邵聯翩賜圭占遂因鼓聲息將帥豈為考擊煩  
 矇眊何人作頌比崧高萬古斯文齊岫嶠動勞至大不矜  
 伐文武未遠猶忠厚欲壽年歲無甲乙豈有名字記誰某

自從周衰更七國竟使秦人有九有掃除詩書誦法律沒  
 棄俎豆陳鞭杻當年何人佐祖龍上蔡公子牽黃狗登山  
 刻石頌功烈後者無繼前無偶皆云皇帝巡四國烹滅強  
 暴救黔首六經既已委灰塵此鼓亦當遭擊剖傳聞九鼎  
 淪泗上欲使萬夫沉水取暴君縱欲窮人力神物義不許  
 秦垢是時石鼓何處避無乃天公令鬼守興亡百變物自  
 閑富貴一朝名不朽細思物理多歎息人生安得如汝壽

王維吳道子畫

何處訪吳畫普門與開元開元有東塔摩詰留手痕吾  
 畫品中莫如二子尊道子實雄放浩如海波翻當其下手  
 風雨快筆所未到氣已吞亭亭雙林間彩暈扶桑暎中有  
 至人談寂滅悟者悲涕迷者手自捫蠻君鬼伯千萬萬相



排競進頭如鼉摩詰本詩老佩芷襲芳蓀今觀此壁畫亦  
若其詩清且敦祇園弟子盡鶴骨心如死灰不復溫門前  
雨叢竹雪節貫霜根交柯亂葉動無數一一皆可尋其源  
吳生雖妙絕猶以畫工論摩詰得之於象外有如仙翮謝  
籠樊吾觀二子皆神俊又於維也歛衽無間言

東湖

吾家蜀江上江水綠如藍爾來走塵土意思殊不堪况當  
岐山下風物尤可慙有山秃如赭有水濁如泔不謂郡城  
東數步見湖潭入門便清輿恍如夢西南泉源從高來隨  
波走涵涵東去觸重阜盡為湖所貪但見蒼石螭開口吐  
清甘借汝腹中過胡為目耽耽新荷弄晚涼輕棹極幽探  
飄風忘遠近偃息遺佩簾深有龜與魚淺有螺與蚌曝晴

復戲雨戢戢多於蠶浮沉無得餌倏忽遽滿籃絲繆雖強

致瑣細安足戡聞昔周道興翠鳳棲孤嵐飛鳴飲此水照

影弄粼粼此古飲鳳池也至今多梧桐合抱如彭聃綵羽無復見

上有鸚搏鶻嗟予生雖晚考古意所妣圖音已漫患猶復

訪僑鄉卷阿詩可繼此意久已含扶風古三輔政事豈汝

諳聊為湖上飲一縱醉後談門前遠行客劫劫無留驂問

胡不回首無乃趁朝參予今正疎懶官長幸見雨不辭日

遊再行恐歲滿三暮歸還倒載鐘鼓已音韻

李氏園李茂正園也今為李氏所有

朝遊北城東回首見脩竹下有朱門家破墻圍古屋舉鞭  
叩其戶幽響答空谷入門所見器十步九移目異花兼四  
方野鳥喧百族其西引溪水活活轉墻曲東注入深林林



東坡詩集 卷之六  
深窓戶綠水光兼竹淨時有獨立鷓林中百尺松歲久蒼  
鱗蹙豈惟此地少意恐關中獨小橋過南浦夾道多喬木  
隱如城百雉挺若舟千斛陰陰日光淡黯黯秋氣蓄盡東  
爲方池野雁雜家鷺紅梨驚合抱耿鳥孤雲覆春光水溶  
漾雪陣風翻撲其北臨長溪波聲捲平陸北山卧可見蒼  
翠間磽秃我時來周覽問此誰所築云昔李將軍負嶮乘  
衰叔抽錢算開口但未榷羹粥當時奪民田失業安敢哭  
誰家美園圃籍沒不容贖此予破千家鬱鬱城之麓將軍  
竟何事蟻蝨生刀韜何嘗載夫酒來此駐車轂空使後世  
人聞名頸猶縮俗猶呼皇后我今官正閑屢至因休  
沐人生營居止竟爲何人卜何當辦一身永與清景逐

秦穆公墓

秦穆在城東墓在城中無百步乃知昔未有此城秦人以  
泉識公墓昔公生不誅孟明豈有死之日而忍用其良乃  
知三子徇公意亦如齊之二子從田橫古人感一飯尚能  
殺其身今人不復見此等乃以所見疑古人古人不可望  
今人益可傷

七月二十四日久不雨出禱磻溪是日宿號縣二  
十五日晚自號縣渡渭宿於僧舍曾閣閣故曾氏  
所建也夜久不寐見壁有前縣令趙薦留名有懷

其人

龕燈明滅欲三更欹枕無人夢自驚深谷留風終夜響亂  
山銜月半牀明故人漸遠無消息古寺空來有姓名欲向  
磻溪問姜叟僕夫屢報斗杓傾



和子由記園中草木四首

煌煌帝王都赫赫走羣彥嗟汝獨何為閉門觀物變微物  
豈足觀汝獨觀不勑牽牛與葵蓼採摘入詩卷吾聞東山  
傅置酒攜嬾婉富貴未能忘聲色聊自遣汝今又不然時  
節看瓜蔓懷寶自足珍藝蘭那計晚吾歸於汝處慎勿嗟  
歲晚

荒園無數畝草木動成林春陽一已敷妍醜各自矜蒲萄  
雖滿架困倒不能任可憐病石榴花如破紅襟葵花雖粲  
粲帶淺不勝簪叢蓼晚可喜輕紅隨秋深物生感時節此  
理等廢興飄零不自由盛亦非汝能  
萱草雖微花孤秀自能拔亭亭亂葉中一一芳心插牽牛  
獨何畏詰曲日牙蘂走尋荆與榛如有宿昔約南齋讀書

處清翠曉如潑偏工貯秋雨歲歲壞籬落

我歸自南山山翠猶在目心隨白雲去夢繞山之麓汝從  
何方來笑齒粲如玉探懷出新詩秀語奪山綠覺來已茫  
昧但記說秋菊有如採樵子入洞聽琴筑歸來寫遺聲猶  
勝人間曲八月十一日夜宿府學方和此詩夢與弟遊南  
山出詩數十篇夢中甚愛之及覺唯記一句云  
蟋蟀悲秋菊

北寺

唐初傳有此亂後不留碑畏虎關門早無村得米遲山泉  
自入甕野桂不勝炊信美那能久應先學忍飢

自仙遊回至黑水見居民姚氏山亭高絕可愛復憇

其上

山鷓曉辭谷似報遊人起出門猶屢顧慘若去吾里道途



險且迂繼此復能幾溪邊有危構歸駕聊復柅愛此山中  
人縹眇如仙子平生慕獨往官爵同一屣胡爲此谿邊眷  
眷若有埃國恩久未報念此慙且泚臨風浩悲吒萬世同  
一軌何年謝簪紱丹砂留迅晷

竹飈

野人獻竹飈腰腹大如盎自言道旁得採不費置罔鳴夷  
讓圓滑混沌慙瘦爽兩牙雖有餘四足僅能髣逢人自驚  
蹶悶若兒脫襁念茲微陋質刀儿安足枉就禽太倉卒羞  
愧不能饗南山有孤熊擇獸行舐掌

漢陂魚

陂在鄆縣

霜筠細破爲雙掩中有長魚如卧劍紫行穿腮氣慘悽紅  
鱗照坐光磨閃攜來雖遠鬣尚動烹不待熟指先染坐客  
相看爲解顏香粳飽送如填塹早歲嘗爲荆渚客黃魚屢  
食沙頭店濱江易採不復珍盈尺輒棄無乃僭自從西征  
復何有欲致南烹嗟久欠游儻瑣細空自醒亂骨縱橫動  
遭砭故人遠餽何以報客俎久空驚忽瞻東道無辭信使  
頻西鄰幸有庖壘醢

十二月十四日夜微雪明日早往南谿小酌至晚

南谿得雪真無價走馬來看及未消獨自披榛尋履迹最  
先犯曉過朱橋誰憐破屋眠無處坐覺村飢語不諳惟有  
暮鴉知客意驚飛千片落寒條

九月中曾題小詩於南溪竹上旣而忘之昨日再遊  
見而錄之

湖上蕭蕭疎雨過山頭靄靄暮雲橫陂塘水落荷將盡城



市人歸虎欲行

司竹監燒葦園因召都巡檢柴監馬左藏以其徒會獵園下

官園刈葦歲留槎深冬放火如紅霞枯槎燒盡有根在春  
雨一洗皆萌芽黃狐老兔最狡捷賣梅百獸常矜誇年年  
此厄竟不悟但愛蒙密爭來家風迴始捲毛尾熱欲出已  
被蒼鷹遮野人來言此最樂徒手曉出歸滿車巡邊將軍  
在近邑呼來颯颯從牙又戍兵久閑可小試戰鼓雖凍猶  
堪槌雄心欲搏南澗虎陣勢頗學常山蛇霜乾火烈聲爆  
野飛走無路號且呀迎人截來春逢箭避火逸去窮投置  
擊鮮走馬殊未厭但恐落日催棲鴉弊弊什鼓坐數獲較  
挂雉兔肩分慶主人置酒聚狂客紛紛醉語晚更譁燎毛  
燔肉不暇割飲啗直欲追羲媼青丘雪事書則與此何  
啻百倍加苦遭諫疏說夷羿又被賦客嘲短者宜如閑官  
走山邑放曠不與趨朝衙農工已畢忘一吳子一豔雖少賓  
殊佳酒酣上馬去不告獵獵霜風吹相剽

和子由木山引水

蜀江久不見滄浪江上枯槎遠可將去一向能一續載汲  
泉何愛一夫忙崎嶇好事人應笑冷淡一無厭意一長遙想  
納涼清夜永恣前微月照汪汪

和董傳留別

麤繒大布裘生涯腹有詩書氣自華厭一元儒一更一瓠葉強  
隨舉子踏槐花囊空不辦尋春馬眼亂行看擇路車得意  
猶堪誇世俗詔黃新濕字如鴉



次韻子由綠筠堂

愛竹能延客求詩剩挂牆  
風梢千蠹亂只恐萬丈長  
谷鳥驚暮響山蜂識酒香  
只應陶靖節會聽北窓涼

送錢藻出守婺州得英字

老手使劇郡高懷厭承明  
聊紆東陽綬一麾冷浸縷東陽  
佳山水未到意已清  
過家父老喜出郭  
盛裝迎子行得所  
願愴恨居者情  
吾君方急賢日盱坐  
迺黃金照樂毅白  
璧賜虞卿子不少  
自貶陳義空呼噪  
古語為郡樂漸恐煩  
敲榜臨分敢不盡  
醉語醒還驚

送劉道原歸觀南康

晏嬰不滿六尺長  
高節萬仞陵首陽  
青衫白髮不自歎  
富貴在天那得忙  
十年閉戶樂幽獨  
百金購書收散亡  
榻來

東觀弄丹墨聊借舊史誅  
姦強孔融不肯下曹操  
汲黯本自輕張湯雖無尺  
箠與寸刃口吻排擊含風  
霜自言靜中閱世俗有似  
不飲觀酒狂衣巾狼藉又  
屢舞傍人大笑供千場交  
朋翩翩去畧盡惟我與子  
猶徬徨世人共棄君獨厚  
豈敢自愛恐子傷朝來告  
別驚何速歸意已逐征鴻  
翔匡廬先生古君子挂冠  
兩紀鬢未蒼定將文度置  
膝上喜動鄰里烹猪羊君  
歸為我道姓字幅巾他日  
容登堂

傅堯俞濟源草堂

微官共有田園興老罷方  
尋隱退廬栽種成陰十年  
事倉皇求買萬金無先生  
卜築臨清濟喬木如今似  
畫圖鄰里亦知偏愛竹春  
來相與護龍雛

和柳子玉過陳絕糧次韻



東坡詩集 十一  
如我自觀猶可厭非君誰復肯相尋圖書跌宕悲年老燈  
火青熒語夜深早歲便懷齊物意微官敢有濟時心南行  
十里成何事一聽秋濤萬鼓音

泗州僧伽塔

我昔南行舟繫汴逆風三日沙吹面舟人共勸禱靈塔香  
火未收旛脚轉回頭頃刻失長橋却到龜山未朝飯至人  
無心何厚薄我自懷私欣所使耕田欲雨刈欲晴去得順  
風來者怨若使人人禱輒遂造物應須日千變我今身世  
兩悠悠去無所逐來無戀得行固願留不惡每到有求神  
亦倦退之舊云三百尺澄觀所營今已換不嫌俗士汗丹  
梯一看雲山遶淮甸

龜山

我生飄蕩去何求再過龜山歲五周身行萬里半天下僧  
卧一庵初白頭地隔中原勞北望潮連滄海欲東遊元嘉  
舊事無人記故壘摧頽今在不

宋文帝遣將拒魏太武築城此山

十月十六日記所見

風高月暗水雲黃淮陰夜發朝山陽山陽曉霧如細雨烟  
炯初日寒無光雲收霧卷已亭午有風北來寒欲僵忽驚  
飛雹穿戶牖迅駛不復容遮防市人顛沛百賈亂疾雷一  
聲如頽墻使君來呼晚置酒坐定已復日照廊悅疑所見  
皆夢寐百種變怪旋消亡共言蛟龍厭舊穴魚鼈隨徙空  
陂塘愚儒無知守章句論說黑白推何祥惟有主人言可  
用天寒欲雪飲此觴

遊金山寺



我家江水初發源，宦遊直送江入海。聞道潮頭一丈高，天寒尚有沙痕在。中泠南畔石盤陀，古來出沒隨濤波。試登絕頂望鄉國，江南江北青山多。羈愁畏晚尋歸楫，山僧苦留看落日。微風萬頃粼文細，斷霞半空魚尾赤。是時江月初生魄，二更月落天深黑。江心似有炬火明，飛焰照山棲鳥驚。悵然歸卧心莫識，非鬼非人竟何物。江山如此不歸山，江神見怪驚我頑。我謝江神豈得已，有田不歸如江水。是夜所見如此。

自金山放船至焦山

金山樓觀何眈眈，撞鐘擊鼓聞淮南。焦山何有有脩竹，採薪汲水僧兩三。雲霾浪打人迹絕，時有沙戶祈春蠶。我來金山更留宿，而此不到心懷慙。同遊盡返決獨往，賦命窮薄輕江潭。清晨無風浪自湧，中流歌嘯倚半酣。老僧下山驚客至，迎笑喜作巴人談。自言久客忘鄉井，只有彌勒爲同龕。困眠得就紙帳暖，飽食未厭山蔬甘。山林飢卧古亦有，無田不退寧非貪。展禽雖未三見黜，叔夜自知七不堪。行當投劾謝簪組，爲我佳處留茆庵。吳人謂水中可田者爲沙，焦山長老中江人也。

次韻子由柳湖感物

憶昔子美在東屯，數間茆屋蒼山根。朝吟草木調蠻獠，欲與猿鳥爭啾喧。子今憔悴衆所棄，驅馬獨出無往還。惟有柳湖萬株柳，清陰與子俱朝昏。胡爲譏評不少借，生意凌挫難爲繁。柳雖無言不解慍，世俗乍見應憮然。嬌姿共愛春濯濯，豈問空腹脩蛇蟠。朝看濃翠傲炎赫，夜愛疎影搖



清圓風翻雪陣春絮亂蠹響啄木秋聲堅四時盛衰各有  
態搖落淒愴驚寒温南山孤松積雪底抱凍不死誰復賢

戲子由

宛丘先生長如丘宛丘學舍小如舟常時低頭誦經史忽  
然欠伸屋打頭斜風吹帷雨注面先生不愧傍人羞任從  
飽死笑方朔肯爲雨立求秦優眼前勃磈何足道處置六  
鑿須天遊讀書萬卷不讀律致君堯舜知無術勸農冠蓋  
闊如雲送老鹽齏甘似蜜門前萬事不挂眼頭雖長低氣  
不屈餘杭別駕無功勞畫堂五丈容旂旄重樓跨空雨聲  
遠屋多人少風騷騷平生所慙今不耻坐對疲氓更鞭箠  
道逢陽虎呼與言心知其非口諾唯居高志下真何益氣  
節消縮今無幾文章小技安足程先生別駕舊齊名如今

衰老俱無用付與時人分重輕

吉祥寺賞牡丹

人老簪花不自羞花應羞土老人頭醉歸扶路人應笑十  
里珠簾半上鉤

六月二十七日望湖樓醉書

黑雲翻墨未遮山白雨跳珠亂入船卷地風來忽吹散望  
湖樓下水如天

放生魚蟹逐人來無主荷花到處開水枕能令山俯仰風  
船解與月裴回

烏菱白芡不論錢亂繫青菰裹綠盤忽憶嘗新會靈觀滯  
留江海得加餐

獻花游女木蘭橈細雨斜風濕翠翹無限芳洲生杜若吳



見不識楚詞招

未成小隱聊中隱可得長閑勝暫閑我本無家更安往故鄉無此好湖山

夜泛西湖二絕

蒼龍已沒牛斗橫東方芒角昇長庚漁人收筒及未曉船過惟有菰蒲聲

湖上禁漁皆盜釣者也

湖光非鬼亦非仙風恬浪靜光滿川須臾兩兩入寺去就視不見空茫然

監試呈諸試官

我本山中人寒苦盜寸廩文詞雖少作勉強非天稟既得旋廢忘懶惰今十稔麻衣如再著墨水真可飲每聞科詔下白汗如流瀉此邦東

會多士敢題品芻蕘盡蘭蓀香

不數葵荏貧家見珠貝眩晃自難審緬懷嘉祐初文格變已甚千金碎全璧百衲收寸錦調和椒桂齷咀嚼沙礫礮廣眉成半額學步歸踔蹀維時老宗伯氣壓羣兒凜蛟龍不世出魚鮪初驚滄至音久乃信知味猶食椹至今天下士微管幾左衽謂當千載後石室祠高朕爾來又一變此學初誰諗權衡破舊法芻豢笑凡

註高言追衛樂篆刻鄙

曹沈先生周孔出弟子淵騫寢却顧老鈍軀頑朴謝鐫錐諸君況才傑容我懶且噤聊欲廢書眠秋濤誼午枕

望海樓晚景二絕

海上濤頭一線來樓前相顧雪成堆從今湖上君須上更看銀山二十回

青山斷處塔層層隔岸人家喚欲磨江上秋風晚來急爲



傳鐘鼓到西興

試院煎茶

蟹眼已過魚眼生，颼颼欲作松風鳴。  
蒙茸出磨細珠落眩，轉盪旣飛雪輕。  
銀瓶瀉湯誇第二，未識古人煎水意。  
古語云煎水不君不見昔時李生好客手自煎，貴從活火發新泉。又煎茶不見昔時李生好客手自煎，貴從活火發新泉。又  
不見今時潞公煎茶學西蜀，定州花瓷琢紅玉。  
我今貧病長苦飢，分無玉盃捧娥眉。  
且學公家作茗飲，樽爐石铤行相隨。  
不用撈腸拄腹文字五千卷，但願一甌常及睡足日高時。

孫莘老求墨妙亭詩

蘭亭繭紙入昭陵，世間遺迹猶龍騰。  
顏公變法出新意，細筋入骨如秋鷹。  
徐家父子亦秀絕，字外出力中藏稜。  
嶧山

傳刻典刑在千載，筆法留陽水杜陵。  
評書貴瘦硬，此論未公。吾不憑短長，肥瘠各有態。  
玉環飛燕誰敢憎，吳興太守真好古。  
購買斷缺揮縑繒，龜趺入坐螭隱壁。  
空齋晝靜聞登登，奇蹤散出走吳越。  
勝事傳說誇友朋，書來乞詩要自寫。  
為把栗尾書谿藤，後來視今猶視昔。  
昔過眼百世如風燈，他年劉郎憶賀監。  
還道同時須伏腊。

是日宿水陸寺寄北山清順僧二首

草沒河堤雨暗村，寺藏脩竹不知門。  
拾薪煮藥憐僧病，掃地燒香淨客魂。  
農事未休侵小雪，佛燈初上報黃昏。  
年來漸識幽居味，息與高人對榻論。  
長嫌鐘鼓聒湖山，此境蕭條却自然。  
乞食遠村真為飽，無言對客本非禪。  
披榛覓路衝泥入，洗足關門聽雨眠。  
遙想



後身窮賈島夜寒應聳作詩肩

將之湖州戲贈莘老

餘杭自是山水窟不聞吳興更清絕湖中橘林新著霜溪  
上茗花正浮雪顧渚茶芽白於齒梅溪木瓜紅勝頰吳兒  
鱸縷薄欲飛未去先說饞涎垂亦知謝公到郡久應怪杜  
牧尋春遲髻絲只好對禪榻湖亭不用張水嬉

鴉種麥行

霜林老鴉閑無用哇東拾麥哇西種哇西種得青猗猗哇  
東已作牛毛稀明年麥熟芒攢粳農夫未食鴉先啄徐行  
俛仰若自矜鼓翅跳踉上牛角噉昔舜耕歷山鳥爲耘如  
今老鴉種麥更辛懃農夫羅拜鳴飛起勸農使者來行水  
和致仕張郎中春書

投綬歸來萬事輕消磨未盡祗風情舊因蓴菜求長假新  
爲楊枝作短行不禱自安緣壽骨苦藏難沒是詩名淺斟  
盃酒紅生頰細琢歌詞穩稱聲蝸殼卜居心自放蠅頭寫  
字眼能明盛衰閱過君應笑寵辱年來我亦平跪履數從  
圯下老逸書閑問濟南生東風屈指無多日祗恐先春鶻  
鷁鳴

冬至日獨遊吉祥寺

井底微陽回未回蕭蕭寒雨濕枯菱何人更似蘇夫子不  
是花時肯獨來

吳中田婦歎

和賈養蒙

今年粳稻熟苦遲庶見霜風來幾時霜風來時雨如瀉杷  
頭出菌鎌生衣眼枯淚盡雨不盡忍見黃穗卧青泥茆苦



一月隴上宿天晴獲稻隨車歸汗流肩頰載入市價賤乞  
與如糠粃賣牛納稅折屋炊慮淺不及明年飢官今要錢  
不要米西北萬里招羌兒糞黃滿朝人更苦不如却作河  
伯婦

遊道場山何山

道場山頂何山麓上徹雲峰下幽谷我從山水窟中來尚  
愛此山看不足陂湖行盡白漫漫青山忽作龍蛇盤山高  
無風松自響誤認石齒號驚湍山僧不放山泉出屋底清  
池照瑤席堦前合抱香入雲月裏仙人親手植出山回望  
翠雲鬟碧瓦朱欄縹緲間白水田頭問行路小溪深處是  
何山高入讀書夜達旦至今山鶴鳴夜半我今廢學不歸  
山山中對酒空三歎

贈莘老

嗟余與子久離羣耳冷心灰百不聞若對青山談世事當  
須舉白便浮君

天目山前淥浸裾碧闌堂下看銜鱸作堤捍水非吾事閑  
送茗溪入太湖

夜來雨洗碧嶺岈浪湧雲屯遶郭寒聞有弁山何處是爲  
君四面竟求看

夜橋燈火照溪明欲放扁舟取次行暫借官奴遣吹笛明  
朝新月到三更

三年京國厭蒸蒿長羨淮魚壓楚糟今日駱駝橋下泊恣  
看脩網出銀刀

秀州報本禪院鄉僧文長老方丈



萬里家山一夢中吳音漸已變兒童每逢蜀叟談終日便  
覺峨眉翠掃空師已忘言真有道我除搜句百無功明年  
采藥天台去更欲題詩滿浙東

宋叔達家聽琵琶

數絃已品龍香撥半而猶遮鳳尾槽新曲翻從玉連瑣舊  
聲終愛鬱輪袍夢回只記歸舟字賦罷雙垂紫錦絛何異  
烏孫送公主碧天無際雁行高

法惠寺橫翠閣

朝見吳山橫暮見吳山縱吳山故多態轉側爲君容幽人  
起朱閣空洞更無物惟有千步岡東西作簾額春來故國  
歸無期人言悲秋春更悲已泛平湖息濯錦更看橫翠憶  
娥眉凋欄能得幾時好不獨憑欄人易老百年興廢更堪

哀懸知草莽化池臺游人尋我舊游處但覓吳山橫處來

有以官法酒見餉者因用前韻求述古爲移厨飲湖

上

喜逢門外白衣人欲膾湖中赤玉鱗遊舫已粧吳榜穩舞  
衫初試越羅新欲將魚釣追黃帽未要靴刀抹絳巾芳意  
十分強半在爲君先踏水邊春

飲湖上初晴後雨二首

朝曦迎客艷重岡晚雨留人入醉鄉此意目佳君不會一  
盃當屬水仙王

湖上有水仙王廟

水光瀲灩晴方好山色空蒙雨亦奇欲把西湖比西子淡  
粧濃抹總相宜

風水洞和李節推

東坡詩少



東坡詩集 十九  
風轉鳴空穴，泉幽瀉石門。虛心聞地籟，妄意覓桃源。過客詩難好，居僧語不繁。歸餅得冰雪，清冷慰文園。

新城道中

東風知我欲山行，吹斷簷間積雨聲。嶺上晴雲披絮帽，樹頭初日挂銅鉦。野桃含笑竹籬短，溪柳自搖沙水清。西崦人家應最樂，煮芹燒筍餉春耕。

山村

煙雨濛濛雞犬聲，有生何處不安生。但教黃犢無人佩，布穀何勞也勸耕。

老翁七十自腰鎌，慙愧春山笱蕨甜。豈是聞韶解忘味，爾來三月食無鹽。

杖藜裹飯去匆匆，過眼青錢轉手空。贏得兒童語音好，

年強半在城中

贈別

青鳥銜巾久欲飛，黃鸞別主更悲啼。慙慙莫忘分攜處，湖水東邊鳳嶺西。

於潛女

青裙縞袂於潛女，兩足如霜不穿屨。簷沙髻髮絲穿竹，蓬沓障前走風雨。老滌宮粧傳父祖，至今遺民悲故主。茗溪楊柳初飛絮，照溪畫眉渡溪去。逢郎樵歸相媚嫵，不信姬姜有齊魯。

僧清順新作垂雲亭

江山雖有餘亭榭，苦難穩登臨。不得要萬象，各偃蹇惜哉。垂雲軒此地，得何晚。天功爭向背，詩眼巧增損。路窮朱欄



出山破石壁狼海門浸坤軸湖尾抱雲巘葱蔥城郭麗淡  
淡煙村遠紛紛鳥鵲去一一漁樵返雄觀快新獲微景收  
昔遁道人真古人嘯吟慕嵇阮空齋卧蒲褐芒屨每自憫  
天憐詩人窮乞與供詩本我詩久不作荒澁旋鉏墾從君  
覓佳句咀嚼廢朝飯

會客有美堂周邠長官與數僧同泛湖往北山湖中

聞堂上歌笑聲以詩見寄因和

載酒無人過子雲掩關晝卧客書裙歌喉不共聽珠貫醉  
面何因作纈紋僧侶且陪香火社詩壇欲歛鶴鵝軍憑君  
徧遶湖邊寺漲淥晴來已十分

追和子由去歲試舉人落下所寄詩暴雨初晴樓上

晚景

秋後風光雨後山滿城流水碧潺潺煙雲好處無多子及  
眾昏鴉未到間

洛邑從來天地中嵩高蒼翠北邙紅風流耆舊消磨盡只

有青山對病翁

謂富公也

白汗翻漿午景前雨餘風物便蕭然應須半熟鵝黃酒照  
見新晴水碧

病中遊 卮塔院

紫李黃瓜村 冷香烏紗白葛道衣涼閉門野寺松陰轉款

枕風軒客夢 長因病得閑殊不惡安心是藥更無方道人

不惜塔前水 借與 飽樽自在嘗

與述古 有美堂乘月夜歸

娟娟雲月猶 轉 漱漱星河半隱山魚鑰未收清夜永鳳

東坡詩抄



蕭猶在翠微  
使君能鼓樂

山 凄風瑟縮經絃柱香霧淒迷着鬢鬟其喜  
人爭看火城還

八月十日看潮

萬人鼓噪懾

人儂猶似浮江老阿童欲識潮頭高幾許越

山渾在浪花

宿九仙

山 九仙謂左元放許邁王謝之流

風流王謝古

真一去空山五百春玉室金堂餘漢士桃

花流水失秦

國眠一榻香凝帳夢遶千巖冷逼身夜半

老僧呼客起

峰缺處湧水輪

初自涇

山歸述古召飲介亭以病先起

西風初作十分涼

喜見新橙透甲香遲暮賞心驚節物登

臨病眼怯秋

光慣眠處士雲庵裏倦醉佳人錦瑟旁猶有

夢迴清興在卧聞歸路樂聲長

九日尋臻閣梨遂泛小舟至懃師院

湖上青山翠

作堆葱蔥鬱鬱氣佳哉笙歌叢裏抽身出雲

水光中洗眼

來白足赤髭迎我笑拒霜黃菊為誰開明年

桑苧煎茶處

憶著衰翁首重迴皎然有九日與陸羽煎茶詩羽自號桑苧翁余來年

九日去此夕矣

次韻述古過周長官夜飲

二更鏡鼓和

諸鄰百首新詩開八珍已遣亂蛙成兩部更

邀明月作

入雲煙湖寺家家鏡燈火沙河夜夜春曷不

勸公勤秉

老來光景似奔輪

述古

詩見責屢不赴會復次前韻

我生孤癖

無鄰老病年來益自珍肯對紅裙辭白酒但



愁新進笑時  
人北山怨鶴休驚夜南畝中車欲及春多謝  
清詩屢推和齋膏那解轉方輪來詩有雲霄滿輪之句

書雙山灌師房

暮鼓朝鐘自擊撞閉門孤枕對殘缸白灰旋撥通紅火卧  
聽蕭蕭雪打窓

和錢安道寄惠建茶

我官于南今幾時嘗盡溪茶與山茗胸中似記故人面口  
不能言心自省爲君細說我未暇試評其畧差可聽建溪  
所產雖不同一天與君子性森然可愛不可慢骨清肉  
膩和且正雪花雨脚何足道啜過始知真味永縱復苦硬  
終可錄汲黯少恣寬饒猛草茶無賴空有名高者妖邪次  
頑穢體輕雖復強浮泛性滯偏工嘔酸冷其間絕品豈不  
佳張禹縱賢非骨鯁葵花玉斝不易致道路幽嶮隔雲嶺  
誰知使者來自西開緘磊落收百餅嗅香嚼味本非別透  
紙自覺光炯炯粃糠團鳳友小龍奴隸日注臣雙井收藏  
愛惜待佳客不敢包裹鑽權倖此詩有味君勿傳空使時  
人怒生瘦

和柳子玉喜雪次韻仍呈述古

詩翁愛酒長如渴餅盡欲沽囊已竭燈青火冷不成眠一  
夜撚鬚吟喜雪詩成就我覓歡處我窮正與君鬚鬢曷不  
走投陳孟公有酒醉君仍飽德瓊瑤欲盡天應惜更遣清  
光續殘月安得佳人擢素手笑捧玉盃兩奇絕豔歌一曲  
迴陽春坐使高堂生暖熱

夜至永樂文長老院文時卧病退院



愁聞巴叟卧荒村來打三更月下門往事過年如昨日此  
生未死得重論老非懷土情相得病不開堂道益尊惟有  
孤栖舊時鶴舉頭見客似長言

除夜野宿常州城外二首

行歌野哭兩堪悲遠火低星漸向微病眼不眠非守歲鄉  
音無伴苦思歸重衾脚冷知霜重新沐頭輕感髮稀多謝  
殘燈不嫌客孤舟一夜許相依  
南來三見歲云徂直恐終身走道塗老去怕看新曆日退  
歸擬學舊桃符煙花已作青春意霜雪偏尋病客鬚但把  
窮愁博長健不辭最後飲屠蘇

常潤道中有懷錢塘寄述古

草長江南鬻亂飛年來事事與心違花開後院還空落燕

入華堂怪未歸世上功名何日是樽前點檢幾人非去年

柳絮飛時節記得金籠放雪衣杭人以放鶴爲太守壽

浮玉山頭日日風即金山也湧金門外已春融二年魚鳥渾相

識三月鶯花付與公剩看新翻眉倒暈未應泣別臉消紅

何人織得相思字寄與江邊北向鴻

惠泉山下土如濡陽羨溪頭米勝珠賣劍買牛吾欲老殺

雞爲忝子來無地偏不信容高蓋俗儉真堪着腐儒莫怪

江南苦留滯經營身計一生迂

遊鶴林招隱二首

郊原雨初霽春物有餘妍古寺滿脩竹深林聞杜鵑睡餘  
柳花墮目眩山櫻然西窓有病客危坐看香煙  
行歌白雲嶺坐咏脩竹林風輕花自落日薄山半陰澗草



誰復識聞香齋難尋時見城市人幽居惜未深

次韻沈長官

造物知吾久念歸似憐衰病不相違風來震澤帆初飽雨  
入松江水漸肥

過永樂文長老已卒

初驚鶴瘦不可識旋覺雲歸無處尋三過門間老病死一  
彈指頃去來今存亡慣見渾無淚鄉井難忘尚有心欲向  
錢塘訪圓澤葛洪川畔待秋深

捕蝗至浮雲嶺山行疲苦有懷子由弟

霜風漸欲作重陽熠熠溪邊野菊黃久廢山行疲犖确尚  
能村醉舞淋浪獨眠林下夢魂好回首人間憂患長殺馬  
毀車從此逝子來何處問行藏

與毛令方尉遊西菩提寺二首

推擠不去已三年魚鳥依然笑我頑人未放歸江北路天  
教看盡浙西山尚書清節衣冠後處士風流水石間一笑  
相逢那易得數詩狂語不須刪

路轉山腰足未移水清石瘦便能奇白雲自占東西嶺明  
月誰分上下池黑黍黃粱初熟後朱柑綠橘半甜時人生  
此樂須天賦莫遣兒曹取次知

雪夜書北臺壁二首

黃昏猶作雨纖纖夜靜無風勢轉嚴但覺衾裯如潑水不  
知庭院已堆鹽五更曉色來書幌半夜寒聲落畫簷試掃  
北臺看馬耳未隨埋沒有雙尖

城頭初日始翻鴉陌上晴泥已沒車凍合玉樓寒起粟光



搖銀海眩生花遺鯉入地應千尺宿麥連雲有幾家老病  
自嗟詩力退空吟冰柱憶劉叉

謝人見和前篇二首

已分酒盃欺淺懦敢將詩律闢深嚴漁蓑句好應須畫柳  
絮才高不道鹽敗屨尚存東郭指飛花又舞謫仙簷書生  
事業真堪笑忍凍孤吟筆退尖

九陌淒風戰齒牙銀杯逐馬帶隨車也知不作堅牢玉無  
奈能開頃刻花得酒強歡愁底事閉門高卧定誰家臺前  
日暖君須愛冰下寒魚漸可叉

遊廬山次韻章傳道

塵容已似服轅駒野性猶同縱鯨魚出入巖巒千仞表較  
量筋力十年初雖無窈窕驅前馬還有鷓夷挂後車莫笑

吟詩淡生活當今阿買爲君書

惜花

吉祥寺中錦千堆

錢塘花最盛處

前年賞花真盛哉道人勸我清

明來腰鼓百面如春雷打徹涼州花自開沙河塘上插花  
回醉倒不覺吳兒吟豈知如今雙鬢催城西古寺沒蒿萊  
有僧閉門手自栽千枝萬葉巧翦裁就中一叢何所似馬  
腦盤成金縷杯而我食菜方清齋對花不飲花應猜夜來  
雨雹如李梅紅殘綠暗吁可哀

送春

和子由

夢裏青春可得追欲將詩句絆餘暉酒闌病客惟思睡蜜  
熟黃蜂亦懶飛芍藥櫻桃俱掃地病過此鬢絲禪榻兩忘  
機憑君借取法界觀一洗人間萬事非來書云近看此書  
余未嘗見也



孔長源挽詞

小偃門頭柳繫船吳山堂上月侵筵潮聲夜半千巖響詩  
句明朝萬口傳長源自越過杭夜飲有美堂上聯句長源  
云天目遠隨雙鳳落海門遙感兩潮趨  
一坐豈意日斜庚子後忽驚歲在巳辰年佳城一閉無窮  
事南望題詩淚灑牋

懷西湖寄晁美叔同年

西湖天下景遊者無愚賢深淺隨所得誰能識其全嗟我  
本狂直早為世所捐獨專山水樂付與寧非天三百六十  
寺幽尋遂窮年所至得其妙心知口難傳至今清夜夢耳  
目餘芳鮮君持使者節風采爍雲煙清流與碧巖安肯為  
君妍胡不屏騎從暨借僧榻眠讀我壁間詩清涼先煩煎  
策杖無道路直造意所便應逢古漁父輩問自黃緣問道  
若有得買魚勿論錢

和蔣夔寄茶

我生百事常隨緣四方水陸無不便扁舟渡江適吳越三  
年飲食窮芳鮮金齏玉膾飯炊雪海螯江柱初脫泉臨風  
飽食甘寢罷一甌花乳浮輕圓自從捨舟入東武沃野便  
到桑麻川翦毛胡羊大如馬誰記鹿角腥盤筵厨中蒸粟  
埋飯甕大杓更取酸生涎柘羅銅碾棄不用脂麻白土須  
盆研故人猶作舊眼看謂我好尚如當年沙溪北苑強分  
別水脚一線爭誰先清詩兩幅寄千里紫金百餅費萬錢  
吟哦烹噉兩奇絕只恐偷乞煩封纏老妻稚子不知愛一  
半已入薑鹽煎人生所遇無不可南北嗜好知誰賢死生  
禍福久不擇更論甘苦爭蚩妍知君窮旅不自釋因詩寄



謝聊相鐫

次韻周郊寄雁蕩山圖

西湖三載與君同馬入塵埃  
鶴入籠東海獨來看出日石  
橋先去踏長虹遙知別後添  
華髮時向樽前說病翁所恨  
蜀山君未見他年攜手醉耶筒

送碧香酒與趙明叔教授

聞君有婦賢且廉勸君慎勿為楚相  
不羨紫駝分御食自遣赤脚踏村釀  
嗟君老狂不知愧更吟醜婦惡嘲謗  
諸生聞語定失笑冬暖號寒臥無帳  
碧香近出帝子家鵝兒破殼酥流益  
不學劉伶獨自飲一壺往助齊眉餉

趙既見和復次韻答之

長安小吏天所放日夜歌呼和丞相  
豈知後世有阿瞞曹公

自言參

北海樽前捉私釀先生未出禁酒國  
詩語孤高常

近謗幾回無酒欲沽君却畏有司書簿帳近制公使酒過法甚重

寒可笑分一斗日飲如何足哀益更將險語壓衰翁只恐

自是臺無餉

趙郎中往莒縣逾月而歸復以一壺遺之仍用原韻

東鄰主人遊不歸悲歌夜夜聞春相  
門前人鬧馬嘶急一家喜氣如春釀  
王事何曾怨獨賢室人豈忍交謫謗  
大兒踉蹌越門限小兒啞語繡帳定  
教舞袖掣伊涼更想夜庖鳴壘盜  
題詩送酒君勿請免使退之嘲一餉

劉貢父見余歌詞數首以詩見戲聊次其韻

十載漂然未可期那堪重作看花詩  
門前惡語誰傳去醉後狂歌自不知  
刺舌君今猶未戒灸眉我亦更何辭  
相從



痛飲無餘事正是春容最好時

次韻子由送蔣夔赴代州學官

功利爭先變法初典刑獨守老成餘窮人未信詩能爾倚  
市懸知繡不如代此諸生漸狂簡牀頭雜說爲爬梳歸來  
問雁吾何敢疾世王符解著書

和李邦直沂山祈雨有應

高田生黃埃下田生蒼耳蒼耳亦已無更問麥有幾蛟龍  
睡足亦解慙二麥枯時雨如洗不知雨從何處來但聞呂  
梁百步聲如雷試上城南望城北際天菽粟青成堆飢火  
燒腸作牛吼不知待得秋成否半年不雨坐龍慵其怨天  
公不怨龍今朝一雨聊自贖龍神社鬼各言功無功日盜  
太倉穀嗟我與龍同此責勸農使者不汝容因君作詩先

自劾

宿州次韻劉涇

我欲歸休瑟漸希舞雩何日着春衣多情白髮三千丈無  
用蒼皮四十圍晚覺文章真小技早知富貴有危機爲君  
垂涕君知否千古華亭鶴自飛

涇之兄沂亦有文死矣

次韻答邦直子由二首

簿書顛倒夢魂間知我疎慵肯見原閑作閉門僧舍冷病  
聞吹枕海濤喧忘懷杯酒逢人共引睡文書信手翻欲吐  
狂言喙三尺怕君瞋我却須吞

邦直屢以此見戒

君雖爲我此遲留別後淒涼我已憂不見便同千里遠退  
歸終作十年遊恨無楊子一區宅懶卧元龍百尺樓聞道  
鷓鴣滿臺閣網羅應不到沙鷗



中秋月

暮雲收盡溢清寒銀漢無聲轉玉盤此生此夜不長好明月明年何處看

韓幹馬十四疋

二馬並驅攢八蹄二馬宛頸鬣尾齊一馬任前雙舉後一馬却避長鳴嘶老髯奚官騎且顧前身作馬通馬語後有八疋飲且行微流赴吻若有聲前者既濟出林鶴後者欲涉鶴俛啄最後一匹馬中龍不嘶不動尾搖風韓生畫馬真是馬蘇子作詩如見畫世無伯樂亦無韓此詩此畫誰當看

哭刁景純

讀書想前輩每恨生不早紛紛少年場猶得見此老此老

如松栢不受霜雪槁直從毫末中自養到合抱宏材乏近用千歲自枯倒文章餘正始風節貫華皓平生為人耳自為薄如縞是非雖難齊反覆看愈好前年旅吳越把酒慶壽考扣門無晨夜百過迹未掃但知從德公未省厭丘嫂別時公八十後會知難保昨日故人書連年喪公媪景純妻先傷心范橋水漾漾舞寒藻華堂不見人瘦馬空戀早我欲江東去匏樽酌行潦鏡湖無賀監慟哭稽山道忍見萬松岡荒池沒秋草

答呂梁仲屯田

亂山合脊圍彭門官居獨在懸水村呂梁地名居民蕭條雜麋鹿小市冷落無雞豚黃河西來初不覺但訝清泗流奔渾夜聞沙岸鳴響盜曉看雪浪浮鵬鯤呂梁自古喉吻地萬



頃一抔何由吞坐觀入市巷問井吏民走盡餘玉尊計窮  
路斷欲安適吟詩破屋愁鳶蹲歲寒霜重水歸壑但見屋  
瓦留沙痕入城相對如夢寐我亦僅免爲魚鼈旋呼歌舞  
雜談笑不惜飲醕空餅盆念君官舍冰雪冷新詩美酒聊  
相溫人生如寄何不樂任使絳螭燒黃昏宣房未築淮泗  
滿故道堙滅瘡痍存明年勞苦應更甚我當畚鍤先黥髡  
付君萬指伐頑石千鎚雷動蒼山根高城如鐵洪口決談  
笑却掃看崩奔農夫掉臂免狼顧秋穀布野如雲屯還須  
更置軟脚酒爲君擊鼓行金樽

春菜

蔓菁宿根已生葉韭牙戴土拳如蕨爛烝香薺白魚肥碎  
點青蒿涼餅滑宿酒初消春睡起細履幽畦掇芳辣茵陳  
甘菊不負渠繪纒堆盤纖手抹北方苦寒今未已雪底菠  
菘如鐵甲豈如吾蜀富冬蔬霜葉露牙寒更茁久拋菘葛  
猶細事苦筍江豚那忍說明年投劾徑須歸莫待齒搖并  
髮脫

讀孟郊詩二首

夜讀孟郊詩細字如牛毛寒燈照昏花佳處時一遭孤芳  
擢荒穢苦語餘詩騷水清石鑿鑿湍激不受篙初如食小  
魚所得不償勞又似煮彭蠡竟日嚼空齏要當闕僧清未  
足當韓豪人生如朝露日夜火消膏何苦將兩耳聽此寒  
蟲號不如且置之飲我玉卮醪

我憎孟郊詩復作孟郊語飢腸自鳴喚空壁轉飢鼠詩從  
肺腑出出輒愁肺腑有如黃河魚出膏以自煮尚愛銅斗



歌鄙俚頗近古  
桃弓射鴨罷  
獨遠短袞舞  
不憂踏船翻  
踏浪不踏土  
吳姬霜雪白  
赤脚浣白紵  
嫁與踏浪兒  
不識離別苦  
歌君江湖曲  
感我長羈旅

約公釋飲是日大風

先生生長匡廬山  
山中讀書三十年  
舊聞飲水師  
顏淵不知治劇  
乃所便  
偷兒夜探赤白丸  
奮髯忽逢朱子元  
半年羣盜誅七百  
誰信家書藏九千  
春風無事秋月閑  
紅粧執樂豪且妍  
紫衫玉帶兩部全  
琵琶一抹四十絃  
客來留飲不計錢  
齊人愛公如子產  
兒啼卧路呼不還  
我慙山郡空留連  
牙兵部吏笑我寒  
邀公飲酒公無難  
約束官奴買花鈿  
薰衣理髮夜不眠  
曉來顛風塵暗天  
我息其由豈坐慳  
作詩愧謝公  
笑蘿歸來瑟縮愈不安  
要當啖公八百里豪

氣一洗儒生酸

夜飲次韻畢推官

簿書叢裏過春風  
酒聖時時且復中  
紅燭照庭嘶  
驪裏黃雞催曉唱  
玲瓏老來漸減金釵  
典醉後空驚玉筍  
工月未上時應早散  
免教絳谷問吾公

續麗人行

李仲謀家有周昉畫背而欠仲內人極精戲作此詩  
深宮無人春日長  
沉香亭北百花香  
美人睡起薄梳洗  
燕舞鸞啼空斷腸  
畫工欲畫無窮意  
背立東風初破睡  
若教回首却嫣然  
陽城下蔡俱風靡  
杜陵飢客眼長寒  
蹇驢破帽隨金鞍  
隔花臨水時一見  
只許腰支背後看  
心醉歸來茆屋底  
方信人間有西子  
君不見孟光舉案與眉齊  
何曾



東坡詩集 卷之三十一  
背面傷春啼

游張山人園

壁間一軸煙蘿子盆裏千枝錦被堆  
慣與先生爲酒伴不嫌刺史亦顏開  
纖纖入麥黃花亂颯颯催詩白雨來  
聞道君家好井水歸軒乞得滿餅回

攜妓樂游張山人園

大杏金黃小麥熟墮巢乳鵲拳新竹  
故將俗物惱幽人細馬紅粧滿山谷  
提壺勸酒意雖重杜鵑催歸聲更速  
酒闌人散却關門寂歷斜陽挂疎木

僕曩於長安陳漢卿家見吳道子畫佛  
碎爛可惜其後十餘年復見之於鮮于  
子駿家則已裝背完好

子駿以見遺作詩謝之



